

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

3. कृष्ण यजुर्वेदीय तैत्तिरीय ब्राह्मणे तृतीयाष्टकं

3.10 तैत्तिरीय यजुर्ब्राह्मणे काठके प्रथमः प्रश्नः(सावित्रचयनम्)

3.10.1 अनुवाकं 1 –अनुवाकेषु नवसु लेखासु नाभ्यां चेष्टकोपधानं स्वयमातृणोपधानं चोच्यते

T.B.3.10.1.1

सं॒ज्ञानं॑ वि॒ज्ञानं॑ प्र॒ज्ञानं॑ जान॒दभि॒जान॑त् ।

सं॒कल्प॑मानं प्र॒कल्प॑मान-मु॒प॒कल्प॑मान-मु॒प॒क्लृ॑प्तं क्लृ॒प्तं ।

श्रे॒यो व॒सी॒य आ॒य॒थ्सं॑भूतं भू॒तं ॥ चि॒त्रः के॒तुः प्र॒भा॒नाभा॑न्थ् सं॒भान् ।

ज्यो॒तिष्मा॑-स्ते॒जस्वा॑नातप॒-स्तप॑न्नभि॒तप॑न् ।

रो॒च॒नो रो॒च॒मानः-शो॒भ॒नः-शो॒भ॒मानः॑ क॒ल्या॑णः ॥

दर्॒शा दृ॒ष्टा दर्॒श॒ता वि॒श्वरू॑पा सु॒दर्॒श॒ना ।

आ॒प्या॒य॒मा॒ना प्या॑य॒मा॒ना-प्या॑या सू॒नृ॒तेरा॑ ।

आ॒पूर्य॑माणा पू॒र्य॑माणा पू॒रय॑न्ती पू॒र्णा पौ॑र्ण॒मासी॑ ॥

दा॒ता प्र॒दा॒ताऽऽन॑न्दो मो॒दः प्र॒मो॒दः । 1 (10)

T.B.3.10.1.2

आ॒वे॒श॒य॒-॒त्रि॒वे॒श॒य॒न्-॒थ्स॒म्-॒वे॒श॒नः॑ स॒ञ्शान्तः॑ शान्तः ।
 आ॒भ॒व॒न् प्र॒भ॒व॒न्-॒थ्सं॒भ॒व॒न्-॒थ्सं॒भू॒तो भू॒तः ॥
 प्र॒स्तु॒तं वि॒ष्टु॒तञ् स॒ञ्स्तु॒तं क॒ल्याणं॑ वि॒श्वरूपं॑ ।
 शु॒क्र॒म॒मृ॒तं ते॒ज॒स्वि ते॒जः॑ स॒मि॒द्धं ।
 अ॒रु॒णं भा॒नु॒म॒न् म॒री॒चि॒म॒द॒भि॒त॒प॒त् त॒प॒स्व॒त् ॥
 स॒वि॒ता प्र॒स॒वि॒ता दी॒प्तो दी॒प॒य॒न् दी॒प्य॒मा॒नः ।
 ज्व॒लं ज्व॒लि॒ता त॒प॒न् वि॒त॒प॒न्-॒थ्स॒न्त॒प॒न् ।
 रो॒च॒नो रो॒च॒मा॒नः शु॒भूः शु॒भ॒मा॒नो वा॒मः ॥
 सु॒ता सु॒न्व॒ती प्र॒सु॒ता सू॒य॒मा॒ना ऽभि॒षू॒य॒मा॒णा ।
 पी॒ती प्र॒पा संपा॑ तृ॒प्ति-॒स्त॒र्प॒य॒न्ती । 2 (10)

T.B.3.10.1.3

का॒न्ता का॒म्या का॒म॒जा॒ता ऽऽयु॑ष्मती का॒म॒दु॒घा ॥
 अ॒भि॒शा॒स्ता ऽनु॑मन्ता-ऽऽन॒न्दो मो॒दः प्र॒मो॒दः ।
 आ॒सा॒द॒य॒न् नि॒षा॒द॒य॒न्-॒थ्सञ्सा॑दनः स॒ञ्स॒न्नः स॒न्नः ।
 आ॒भू वि॒भूः प्र॒भूः शं॒भू भु॒वः ॥ प॒वि॒त्रं प॒व॒यि॒ष्य॒न् पू॒तो मे॒द्ध्यः॑ ।

य॒शो य॒शस्वा-ना॒युरमृ॑तः । जी॒वो जी॒विष्यन्॑ थ॒स्वर्गो लो॒कः ॥
सह॑स्वान् थ॒सही॑या-नोज॒स्वान् थ॒सह॑मानः ।
जय॑न्न-भिज॒यन्-थ॒सुद्र॑वि॒णो द्र॒वि॒णोदाः॑ ।
आ॒र्द्रप॑वि॒त्रो हरि॑केशो॒ मोदः॑ प्र॒मोदः॑ ॥ 3 (10)

T.B.3.10.1.4

अ॒रु॒णो ऽरु॒णर॑जाः पु॒ण्डरी॑को वि॒श्वजि॑द-भि॒जित् ।
आ॒र्द्रः पि॒न्वमा॑नो ऽन्न॒वान्-र॑स॒वा-नि॑रा॒वान् ।
स॒र्वो॒षधः॑ सं॒भरो॑ म॒हस्वा॑न् ॥ ए॒ज॒त्का जी॑व॒त्काः ।
क्षु॒ल्ल॒काः शि॑पि॒विष्ट॑काः ।
स॒रि॒स्त्रराः॑ सु॒शेर॑वः । अ॒जि॒रासो॑ ग॒मिष्ठा॑वः ॥
इ॒दानीं॑ त॒दानी॑-मे॒तर्हि॑ क्षि॒प्रम॑जि॒रं ।
आ॒शु नि॑मेषः फ॒णो द्र॑व॒न्नति॑-द्र॒वन् ।
त्वर॑ स्त्वर॒माण आ॒शुरा॑शी॒याञ्ज॒वः {आ॒शुरा॑शी॒यान् ज॒वः} () ॥
अ॒ग्नि॒ष्टोम॑ उ॒क्थ्यो॑ ऽति॒रात्रो॑ द्वि॒रात्र॑-स्त्रि॒रात्र॑-श्च॒तूरा॑त्रः ।
अ॒ग्निर्. ऋ॒तुः सूर्य॑ ऋ॒तुश्च॒न्द्रमा॑ ऋ॒तुः ॥

प्र॒जाप॑तिः स॒म्व॑त्सरो॒ महा॑न्कः ॥ 4 (13)

(प्र॒मोद॑ – स्त॒र्पय॑न्ती – प्र॒मोदो॑ – ज॒वस्त्री॑णि च) (A1)

3.10.2 अनुवाकं 2 – अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते

T.B.3.10.2.1

भूर॒ग्निं च॑ पृथि॒वीं च॑ मां च॑ । त्री॒ऽश्च॑ लो॒कान् थ्स॑म्व॒त्सरं॑ च॑ ।
प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद्-ध्रु॒वा सी॑द ॥
भुवो॑ वा॒युं चान्तरि॑क्षं च॑ मां च॑ । त्री॒ऽश्च॑ लो॒कान् थ्स॑म्व॒त्सरं॑ च॑ ।
प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद् ध्रु॒वा सी॑द ।
स्वरा॑दि॒त्यं च॑ दि॒वं च॑ मां च॑ । त्री॒ऽश्च॑ लो॒कान् थ्स॑म्व॒त्सरं॑ च॑ () ।
प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद् ध्रु॒वा सी॑द ।
भूर्भुवः॑ स्व-श्चन्द्र॑मसं च॑ दि॒शश्च॑ मां च॑ ।
त्री॒ऽश्च॑ लो॒कान् थ्स॑म्व॒त्सरं॑ च॑ । प्र॒जाप॑तिस्त्वा सादयतु ।
तया॑ दे॒वतया॑ ऽङ्गि॒रस्वद् ध्रु॒वा सी॑द ॥ 5 (16)

(स॒म्व॑त्स॒रं च॑ षट् च॑) (A2)

**3.10.3 अनुवाकं 3 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.3.1

त्वमे॒व त्वां॑ वै॒त्थ यो॑ऽसि॒ सोऽसि॑ । त्वमे॒व त्वा॑मचै॒षीः ।
चि॒तश्चा॑सि॒ संचि॑त-श्चा॒स्यग्ने॑ । ए॒तावा॑ञ्चा॒सि भू॒याञ्चा॑स्यग्ने॑ ।
यत्ते॑ अग्ने॒ न्यूनं॑ च॒दु ते॑ऽति॒रिक्तं॑ । आ॒दि॒त्या-स्त॑दंङ्गि॒रस-श्चि॑न्वन्तु ।
वि॒श्वे ते॑ दे॒वाश्चि॑ति॒-मा॒पूर॑यन्तु । चि॒तश्चा॑सि॒ संचि॑त-श्चा॒स्यग्ने॑ ।
ए॒तावा॑ञ्चा॒सि भू॒याञ्चा॑स्यग्ने॑ ।
मा ते॑ अग्ने॒ ऽच॒येन॑ मा॒ऽति च॑ ये॒नायु॑रावृ॒क्षि () ।
सर्वे॑षां॒ ज्योति॑षां॒ ज्योति॑ र्यद॒दावु॑देति॑ । तप॑सो जा॒तम॑नि॒-भृष्ट॑मोजः ।
तत्ते॑ ज्योति॒रिष्ट॑के । ते॒न मे॑ तप । ते॒न मे॑ ज्वल । ते॒न मे॑ दी॒दिहि॑ ।
याव॑द्दे॒वाः । याव॑द॒साति॑ सूर्यः॑ । याव॑दु॒तापि॑ ब्र॒ह्म ॥ 6 (19)
(आ॒वृक्षि॑ नव॑ च) (A3)

**3.10.4 अनुवाकं 4 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.4.1

सम्॑व॒थ्सरो॑ऽसि॒ परिव॑थ्सरो॑ऽसि । इ॒दा॒व॒थ्सरो॑ऽसी॒-दु॒व॒थ्सरो॑ऽसि ।
इ॒द्व॒थ्सरो॑ऽसि॒ व॒थ्सरो॑ऽसि । तस्य॑ ते वसन्तः शिरः॑ ।
ग्री॒ष्मो दक्षि॑णः पक्षः । व॒र्षाः पु॒च्छं॑ । श॒रदु॑त्तरः पक्षः ।
हे॒म॒न्तो म॒द्ध्यं॑ । पू॒र्व॒प॒क्षाश्चि॑तयः । अ॒पर॒प॒क्षाः पु॒रीषं॑ । 7 (10)

T.B.3.10.4.2

अ॒हो॒रा॒त्रा-णी॑ष्टकाः । ऋ॒षभो॑ऽसि स्वर्गो॑ लोकः ।
यस्यां॑ दि॒शि म॒हीय॑से । ततो॑ नो म॒ह आव॑ह ।
वा॒यु भू॑त्वा सर्वा॑ दि॒श आ॒वाहि॑ । सर्वा॑ दि॒शोऽनु॑ वि॒वाहि॑ ।
सर्वा॑ दि॒शोऽनु॑ सम्॑वा॒हि । चि॒त्या चि॒ति-मा॑पृण ।
अ॒चि॒त्या चि॒ति-मा॑पृण । चि॒दसि॑ स॒मु॒द्रयो॑निः । 8 (10)

T.B.3.10.4.3

इ॒न्दु र्दक्षः॑ श्ये॒न ऋ॒तावा॑ । हि॒रण्य॑पक्षः शकु॒नो भु॑र॒ण्युः ।
म॒हान् थ्स॑धस्थे॒ ध्रुव॑ आ॒निष॑त्तः ।
नम॑स्ते अस्तु॒ मा मा हि॑ऽसीः । ए॒ति प्रे॒ति वी॒ति स॒मित्यु॑दिति ।

दि॒वं मे॑ यच्छ । अ॒न्तरि॑क्षं मे॑ यच्छ । पृ॒थि॒वीं मे॑ यच्छ ।

पृ॒थि॒वीं मे॑ यच्छ । अ॒न्तरि॑क्षं मे॑ यच्छ () । दि॒वं मे॑ यच्छ ।

अ॒ह्ना प्र॑सारय । रा॒त्र्या स॑मच । रा॒त्र्या प्र॑सारय । अ॒ह्ना स॑मच ।

का॒मं प्र॑सारय । का॒मं स॑मच ॥ 9 (17)

(पु॒री॒षः – स॒मु॒द्रयो॑निः – पृ॒थि॒वीं मे॑ यच्छ॒न्तरि॑क्षं मे॑ यच्छ स॒प्त च॑)
(A4)

**3.10.5 अनुवाकं 5 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.5.1

भूर्भु॒वः स्वः॑ । ओ॒जो ब॑लं । ब्र॒ह्म क्ष॑त्रं । य॒शो म॑हत् ।

स॒त्यं तपो॑ नाम । रू॒प-म॑मृतं । चक्षुः॑ श्रो॒त्रं । मन॑ आयुः ।

वि॒श्वं य॑शो म॒हः । स॒मं तपो॑ ह॒रो भाः॑ () ।

जा॒तवे॑दा यदि॒ वा पा॑वकोऽसि । वै॒श्वान॑रो यदि॒ वा वै॑द्युतोऽसि ।

शं प्र॒जाभ्यो॑ यज॑मानाय लो॒कं ।

ऊ॒र्जं पु॒ष्टिं द॑द-द॒भ्याव॑वृथस्व ॥ 10 (14)

(भा॒श्च॒त्वा॒रि च॑) (A5)

**3.10.6 अनुवाकं 6 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.6.1

रा॒ज्ञी॑ वि॒रा॒ज्ञी॑ । स॒म्रा॒ज्ञी॑ स्व॒रा॒ज्ञी॑ । अ॒र्चिः॑ शो॒चिः॑ ।
तपो॑ ह॒रो भाः॑ । अ॒ग्नि॑-रि॒न्द्रो बृ॒हस्प॑तिः । वि॒श्वे दे॒वा भु॑वनस्य गो॒पाः ।
ते मा॒ सर्वे॑ यश॑सा स॒सृज॑न्तु ॥ 11 (7)

(रा॒ज्ञीन्द्रो॑ मा स॒प्त (A6)

**3.10.7 अनुवाकं 7 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.7.1

अस॑वे स्वा॒हा वस॑वे स्वा॒हा । वि॒भुवे॑ स्वा॒हा वि॒वस्व॑ते स्वा॒हा ।
अ॒भिभु॑वे स्वा॒हा-ऽधि॑पतये स्वा॒हा ।
दि॒वांप॑तये स्वा॒हा ऽ॒हस्प॑त्याय स्वा॒हा ।
चाक्षु॑ष्मत्याय स्वा॒हा ज्यो॑तिष्मत्याय स्वा॒हा ।
रा॒ज्ञे स्वा॒हा वि॒रा॒ज्ञे स्वा॒हा । स॒म्रा॒ज्ञे स्वा॒हा स्व॒रा॒ज्ञे स्वा॒हा ।
शू॒षाय॑ स्वा॒हा सू॒र्याय॑ स्वा॒हा । च॒न्द्रम॑से स्वा॒हा ज्यो॑तिषे स्वा॒हा ।

स॒र्प॒र्षाय॑ स्वा॒हा क॒ल्याणाय॑ स्वा॒हा () ।

अ॒र्जु॒नाय॑ स्वा॒हा ॥ 12 (11)

(क॒ल्याणाय॑ स्वा॒हैकं॑ च) (A7)

**3.10.8 अनुवाकं 8 –अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.8.1

वि॒प॒श्चि॒ते प॒व॒मा॒नाय॑ गा॒यत॑ । म॒ही न॑ धा॒रा ऽत्य॑न्धो अ॒र्ष॒ति ।
अ॒हि॒र्ह॒ जी॒र्णाम॑ति॒स॒र्प॒ति त्वचं॑ । अ॒त्यो न॑ क्रीड॑न्न स॒र॒द्वृषा॑ ह॒रिः ।
उ॒प॒या॒म॒गृ॒हीतो॑ऽसि मृ॒त्यवे॑ त्वा जुष्टं॑ गृह्णामि ।
ए॒ष ते॒ योनि॑र्मृ॒त्यवे॑ त्वा ॥ अ॒प॒ मृ॒त्यु-म॒प॒क्षुधं॑ । अ॒पे॒तः श॒प॒थं ज॒हि ।
अ॒धा नो॑ अ॒ग्न आ॒व॒ह । रा॒य॒स्पोष॑ सह॒स्रिणं॑ । 13 (10)

T.B.3.10.8.2

ये ते स॒हस्र॑म॒युतं॑ पा॒शाः । मृ॒त्यो म॒र्त्याय॑ ह॒न्त॒वे ।
ता॒न् य॒ज्ञस्य॑ मा॒यया॑ । स॒र्वान॑व॒ य॒जाम॑हे ॥ भ॒क्षो ऽस्य॑मृत॒ भ॒क्षः ।
तस्य॑ ते मृ॒त्यु-पी॒तस्या॑-मृ॒तव॑तः । स्व॒गा-कृ॑तस्य॒ मधु॑मतः ।
उ॒प॒हू॒तस्यो॑-प॒हू॒तो भ॑क्षयामि ॥
म॒न्द्रा ऽभि॑भूतिः के॒तु र्य॒ज्ञानां॑ वाक् । अ॒सावे॑हि । 14 (10)

T.B.3.10.8.3

अ॒न्धो जा॒गृ॒विः प्रा॒ण । अ॒सा॒वेहि॑ । ब॒धि॒र आ॑क्र॒न्द॒यित॑-र॒पान॑ ।
अ॒सा॒वेहि॑ । अ॒ह॒स्तो॒स्त्वा चक्षुः॑ । अ॒सा॒वेहि॑ । अ॒पा॒दा॒शो मनः॑ ।
अ॒सा॒वेहि॑ । क॒वे वि॒प्र॒चित्ते श्रो॒त्र । अ॒सा॒वेहि॑ । 15 (10)

T.B.3.10.8.4

सु॒ह॒स्तः सु॒वा॒साः । शू॒षो ना॒मा॒स्य॑-मृ॒तो म॒र्त्येषु॑ ।
त॒त्त्वाऽहं॑ त॒था वे॒द । अ॒सा॒वेहि॑ । अ॒ग्नि॒र्मे वा॒चि श्रि॒तः ।
वा॒ग्धृ॒दये॑ । हृ॒दयं॑ म॒यि । अ॒ह॒म॒मृ॒ते॑ ।
अ॒मृ॒तं ब्र॒ह्म॒णि । वा॒यु॒र्मे प्रा॒णे श्रि॒तः । 16 (10)

T.B.3.10.8.5

प्रा॒णो हृ॒दये॑ । हृ॒दयं॑ म॒यि । अ॒ह॒म॒मृ॒ते॑ । अ॒मृ॒तं ब्र॒ह्म॒णि ।
सू॒र्यो मे॑ चक्षु॒षि श्रि॒तः । चक्षु॒र् हृ॒दये॑ । हृ॒दयं॑ म॒यि । अ॒ह॒म॒मृ॒ते॑ ।
अ॒मृ॒तं ब्र॒ह्म॒णि । च॒न्द्र॒मा मे॑ म॒न॒सि श्रि॒तः । 17 (10)

T.B.3.10.8.6

म॒नो हृ॒दये॑ । हृ॒दयं॑ म॒यि । अ॒ह॒म॒मृ॒ते॑ । अ॒मृ॒तं ब्र॒ह्म॒णि ।
दि॒शो मे॑ श्रो॒त्रे श्रि॒ताः । श्रो॒त्रं हृ॒दये॑ । हृ॒दयं॑ म॒यि । अ॒ह॒म॒मृ॒ते॑ ।
अ॒मृ॒तं ब्र॒ह्म॒णि । आ॒पो मे॑ रे॒त॒सि श्रि॒ताः । 18 (10)

T.B.3.10.8.7

रेतो हृदये । हृदयं मयि । अहममृते ॥ अमृतं ब्रह्मणि ।
पृथिवी मे शरीरे श्रिता । शरीरं हृदये । हृदयं मयि । अहममृते ॥
अमृतं ब्रह्मणि । ओषधिवनस्पतयो मे लोमसु श्रिताः । 19 (10)

T.B.3.10.8.8

लोमानि हृदये । हृदयं मयि । अहममृते ॥ अमृतं ब्रह्मणि ।
इन्द्रो मे बले श्रितः । बलं हृदये । हृदयं मयि । अहममृते ॥
अमृतं ब्रह्मणि । पर्जन्यो मे मूर्द्धनि श्रितः । 20 (10)

T.B.3.10.8.9

मूर्द्धा हृदये । हृदयं मयि । अहममृते ॥ अमृतं ब्रह्मणि ।
ईशानो मे मन्यौ श्रितः । मन्युर् हृदये । हृदयं मयि । अहममृते ॥
अमृतं ब्रह्मणि । आत्मा मे आत्मनि श्रितः() । 21 (10)

T.B.3.10.8.10

आत्मा हृदये । हृदयं मयि । अहममृते ॥ अमृतं ब्रह्मणि ।
पुनर्म आत्मा पुनरायुरागात् । पुनः प्राणः पुनराकूत-मागात् ।
वैश्वानरो रश्मिभिर्विवृधानः । अन्तस्तिष्ठत्वमृतस्य गोपाः ॥ 22 (8)

(स॒हस्रि॑ण – मि॒हि – श्रो॒त्रासा॑वेहि – प्रा॒णो श्रि॒तो – मन॑सि श्रि॒तो –
रेत॑सि श्रि॒ता – लोम॑सु श्रि॒ता – मूर्द्द॑धि श्रि॒त – आ॒त्मनि॑ श्रि॒तो –
+ ऽष्टौ च॑) (A8)

Special Korvai

(अ॒ग्निर् वा॒युः सूर्य॑ श्र॒न्द्रमा॑ दि॒श आपः॑ पृ॒थि व्यो॑षधिवनस्प॒तय॑
इ॒न्द्रः पर्ज॑न्य ई॒शान॑ आ॒त्मा पुन॑र्मे त्रयो॑दश)

**3.10.9 अनुवाकं 9 – अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.9.1

प्र॒जाप॑ति र्दे॒वान॑सृज॒त । ते पा॒प्मना॑ संदि॒ता अजा॑यन्त ।
तान् व्य॑द्यत् । यद् व्य॑द्यत् । तस्मा॑द् वि॒द्युत् । तम॑वृश्चत् ।
यद॑वृश्चत् । तस्मा॑द् वृ॒ष्टिः । तस्मा॑द् यत्रै॒ते दे॒वते॑ अभि॒प्राप्नु॑तः ।
वि॒च है॒वास्य॑ तत्र पा॒प्मान॑न्ध॒तः । 23 (10)

T.B.3.10.9.2

वृ॒श्चतश्च॑ ॥ सै॒षा मी॒मांसा॑ऽग्नि॒होत्र॑ ए॒व संप॑न्ना । अथो॑ आहुः ।
सर्वे॑षु य॒ज्ञक्र॑तुष्वि॒ति ॥ होष्य॑न्नप॒ उप॑स्पृ॒शेत् ।
वि॒द्युद॑सि वि॒द्यमे॑ पा॒प्मान॑मि॒ति । अथ॑ हु॒त्वोप॑स्पृ॒शेत् ।

वृष्टि॑रसि॒ वृश्च॑ मे पा॒प्मान॑मिति ।

यक्ष्य॑माणो वेष्ट्वा वा । वि च है॒वास्यै॑ते दे॒वते॑ पा॒प्मानं॑ द्यतः । 24 (10)

T.B.3.10.9.3

वृश्च॑तश्च ॥ अत्य॑हो हारु॒णिः । ब्र॒ह्मचा॒रिणै॑ प्र॒श्नान् प्रोच्य॑ प्रजि॒घाय॑ ।
परे॑हि । प्लक्षं॑ दैयां॑ (दैय्यां॑) पातिं पृच्छ ।

वेत्थ॑ सावि॒त्रां(३) न वेत्था॑(३) इति ।

तमा॑गत्य पप्रच्छ । आ॒चार्यो॑ मा प्राहै॑षीत् ।

वेत्थ॑ सावि॒त्रां(३) न वेत्था॑(३) इति । सहो॑वाच वेदेति ॥ 25 (10)

T.B.3.10.9.4

स कस्मिन्॑ प्रति॒ष्ठित॑ इति । परो॑रजसीति ।

कस्तद्यत् परो॑रजा इति । एष॑ वाव स परो॑रजा इति होवाच ।

य एष॑ तपति । एषो॑ ऽर्वाग्रजा इति । स कस्मिन्॑ त्वेष॑ इति ।

सत्य॑ इति । किं तथ्स॒त्यमि॑ति । तप॑ इति । 26 (10)

T.B.3.10.9.5

कस्मिन्नु॑ तप॑ इति । बल॑ इति ।

किं तद् बल॑मिति । प्राण॑ इति ।

मास्म॑ प्राणमति पृच्छ इति माऽऽचार्यो॑ ऽब्रवी॑दिति होवाच ब्रह्म॒चारी॑ ॥

सहो॑वाच प्लक्षो॑ दैयां॑ (दैय्यां॑) पातिः ।

यद्वै॑ ब्रह्म॑चारिन् प्राण॑मत्यप्रक्ष्यः । मूर्द्धा॑ ते व्यप॑तिष्यत् ।

अह॑मुत आ॒चार्या॑-च्छ्रे॒यान् भवि॑ष्यामि ।

यो मा॑ सावि॒त्रे स॒मवा॑दिष्टेति । 27 (10)

T.B.3.10.9.6

तस्मा॑त् सावि॒त्रे न स॒म्वदे॑त् ॥

स यो॑ हवै॒ सावि॑त्रं वि॒दुषा॑ सावि॒त्रे स॒म्वदे॑ते ।

सहा॑स्मि-जि॒ह्वयं॑ दधाति ।

अनु॑ हवा॒ अस्मा॑ असौ॒ तपज्जि॑ह्वयं मन्यते ।

अन्व॑स्मै श्री॒स्तपो॑ मन्यते । अन्व॑स्मै तपो॒ बलं॑ मन्यते ।

अन्व॑स्मै बलं॑ प्राणं॑ मन्यते ॥ स यदा॑ह ।

संज्ञा॑नं वि॒ज्ञानं॑ दर्शा॑ दृष्टेति । ए॒ष ए॒व तत् ॥ 28 (10)

T.B.3.10.9.7

अथ॑ यदा॑ह । प्र॒स्तुतं॑ वि॒ष्टुतं॑ सु॒ता सु॒न्वती॑ति । ए॒ष ए॒व तत् ॥

ए॒ष ह्ये॒व ता॒न्यहा॑नि । ए॒ष रा॒त्रयः॑ ॥ अथ॑ यदा॑ह ।

चि॒त्रः के॒तुर्दा॑ता प्र॒दाता॑ स॒विता॑ प्र॒सवि॑ता ऽभि॒शास्ता॑ ऽनु॒मन्ते॑ति ।

ए॒ष ए॒व तत् । ए॒ष ह्ये॒व तेऽहो॑ मु॒हूर्ताः॑ ।

ए॒ष रा॒त्रेः॑ ॥ 29 (10)

T.B.3.10.9.8

अथ॑ यदा॒ह । प॒वि॒त्रं प॒वयि॑ष्यन्-थ्सह॑स्वान्-थ्सही॑यान॒रुणो॑
ऽरु॒णर॑जा इति॑ । ए॒ष ए॒व तत् । ए॒ष ह्ये॒व ते॑ ऽर्द्ध॑मा॒साः ।

ए॒ष मा॒साः॑ ॥ अथ॑ यदा॒ह ।

अ॒ग्नि॒ष्टोम॑ उ॒क्थ्यो॑ऽग्नि॒र्ऋ॒तुः प्र॒जाप॑तिः स॒म्व॑त्सर इति॑ ।

ए॒ष ए॒व तत् । ए॒ष ह्ये॒व ते॑ य॒ज्ञक्र॑तवः । ए॒ष ऋ॒तवः॑ । 30 (10)

T.B.3.10.9.9

ए॒ष स॒म्व॑त्सरः ॥ अथ॑ यदा॒ह । इ॒दानीं॑ त॒दानी॑मिति॑ । ए॒ष ए॒व तत् ।

ए॒ष ह्ये॒व ते॑ मु॒हूर्तानां॑ मु॒हूर्ताः॑ ॥ ज॒नको॑ ह॒ वै दे॑हः ।

अ॒होरा॑त्रैः स॒माज॑गाम । त॒च्छो॑चुः । यो वा अ॒स्मान् वेद॑ ।

वि॒जह॑त्-पा॒प्मान॑मेति॑ । 31 (10)

T.B.3.10.9.10

सर्व॑-मा॒युरे॑ति । अ॒भि स्व॑र्गं लो॒कं ज॑यति ।

नास्या॑-मु॒ष्मिन् लो॒केऽन्नं॑ क्षी॒यत॑ इति॑ ॥ वि॒जह॑द्ध॒ वै पा॒प्मान॑मेति॑ ।

सर्व॑मा॒युरे॑ति । अ॒भि स्व॑र्गं लो॒कं ज॑यति ।

नास्या-मुष्मिन् लोके ऽन्नं क्षीयते ।

य एवं वेद ॥ अहीना हाश्चत्थ्यः । सावित्रं विदां चकार । 32 (10)

T.B.3.10.9.11

स ह ह॒सो हिरण्मयो भूत्वा । स्वर्गं लोकमियाय ।

आदित्यस्य सायुज्यं ॥ ह॒सो ह॒वै हिरण्मयो भूत्वा ।

स्वर्गं लोकमेति । आदित्यस्य सायुज्यं । य एवं वेद ॥

देवभागो ह श्रौतर्षः । सावित्रं विदां चकार ।

त॒ ह वागदृश्यमाना ऽभ्युवाच । 33 (10)

T.B.3.10.9.12

सर्वम्बत गौतमो वेद । यः सावित्रं वेदेति । स होवाच ।

कैषा वागसीति । अयमह॒ सावित्रः । देवाना-मुत्तमो लोकः ।

गुह्यं महो बिभ्रदिति । एतावति ह गौतमः ।

यज्ञोपवीतं कृत्वा-ऽधो निपपात । नमो नम इति । 34 (10)

T.B.3.10.9.13

स होवाच । मा भैषी गौतम । जितो वै ते लोक इति ॥

तस्माद्ये के च सावित्रं विदुः । सर्वे ते जितलोकाः ॥

स यो ह॒वै सावित्र-स्याष्टाक्षरं पद॑ श्रिया ऽभिषिक्तं वेद ।

श्रिया है॒वाभिषि॑च्यते । घृ॒णिरि॒ति॒ द्वे अक्ष॑रे ।

सूर्य॑ इति॒ त्रीणि॑ । आ॒दि॒त्य इति॒ त्रीणि॑ । 35 (10)

T.B.3.10.9.14

ए॒तद्वै सा॒वि॒त्र-स्या॒ष्टाक्ष॑रं प॒दञ्च॑ श्रियाभिषि॑क्तं । य ए॒वं वै॑दे ।

श्रिया है॒वाभिषि॑च्यते ॥ तदे॒-तदृ॒चा-ऽभ्यु॑क्तं ।

ऋ॒चो अक्ष॑रे पर॒मे व्यो॑मन् । यस्मिन् दे॒वा अधि॑ विश्वे निषे॒दुः ।

यस्तन्न वेद॑ कि॒मृ॒चा क॑रिष्यति । य इत् तद्विदुस्त॑ इ॒मे समा॑सत॒ इति॑ ॥

न ह॒वा ए॒तस्य॑र्चा न यजु॑षा न साम्ना-ऽथो॑ऽस्ति ।

यः सा॒वि॒त्रं वै॑दे ॥ 36 (10)

T.B.3.10.9.15

तदे॒तत् परि॑ यदे॒वच॑क्रं । आ॒र्द्रं पि॒न्वमा॑नञ्च॑ स्वर्गे लो॒क ए॑ति ।

विज॑हद् विश्वा भू॒तानि॑ संपश्यत् ॥

आ॒र्द्रो ह॒ वै पि॒न्वमा॑नः स्वर्गे लो॒क ए॑ति ।

विज॑हन् विश्वा भू॒तानि॑ संपश्यन् । य ए॒वं वै॑दे ॥

शू॒षो ह॒वै वा॒र्ष्णे॒यः । आ॒दि॒त्येन॑ समाज॑गाम । तञ् हो॒वाच॑ ।

एहि॑ सा॒वि॒त्रं वि॒द्धि () ।

अ॒यं॑ वै॒ स्व॒र्ग्यो॑ऽग्निः॑ पा॒रयि॑ष्णु-र॒मृता॑-थ्सं॒भूत॑ इति॑ ।

ए॒ष वा॒व स सा॒वित्रः॑ । य ए॒ष तप॑ति ।

एहि॑ मां वि॒द्धि । इति॑ है॒वैनं॑ तदु॒वाच ॥ 37 (15)

(द्य॒तो - द्य॒तो - वे॒देति॑ - तप॑ इति॑ - स॒मवा॑दि॒ष्टेति॑ - तद् - रा॒त्रेर्-
- ऋ॒तवः॑ - एति॑ - च॒कारो॑ - वा॒च - नम॑ इत्या॑ - दि॒त्य इति॑ त्रीणि॑
- सा॒वित्रं॑ वै॒द - वि॒द्धि पञ्च॑ च) (A9)

Special Korvai

(प्र॒जाप॑तिर्दे॒वान् सं॒ज्ञानं॑ प्र॒स्तुतं॑ ता॒न्यहा॑न्येष रा॒त्रया॑स्चि॒त्र के
तु॒स्तेऽहो॑ मु॒हूर्तो॑ रा॒त्रेः प॒वित्रं॑ ते॒ऽर्ध मा॒सा अ॒ग्निष्टो॑मो य॒ज्ञक्र॑तव
इ॒दानीं॑ मु॒हूर्तानां॑ ज॒नको॑ऽही॒ना दे॒वभा॑गः कै॒षा वा॒ङ्म शू॒षो ह वै
षोड॑श)

**3.10.10 अनुवाकं 10 – अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.10.1

इ॒यं वा॒व सर॑धा । तस्या॑ अ॒ग्निरे॒व सा॒रघं॑ म॒धु ।

या ए॒ताः पूर्॒वप॑क्षा-प॒रप॑क्षयो॒ रात्र॑यः । ता म॒धुकृ॑तः ।

यान्य॑हानि । ते म॑धुवृ॒षाः ।

स यो ह॒ वा ए॒ता म॑धुकृ॒तश्च॑ म॑धुवृ॒षाञ्च॑ वेद ।

कुर्व॑न्ति हा॒स्यैता॒ अ॒ग्नौ म॑धु । ना॒स्येष्टा॑पूर्तं ध॒यन्ति ॥

अथ॑ यो न वेद । 38 (10)

T.B.3.10.10.2

न हा॒स्यैता॒ अ॒ग्नौ म॑धु कुर्व॑न्ति । ध॒यन्त्य॑स्येष्टापूर्तं ॥

यो ह॒ वा अ॒होरा॒त्राणां॑-नाम॒धेयानि॑ वेद ।

नाहो॑रात्रेष्वा-र्तिमा॒र्च्छति॑ । सं॒ज्ञानं॑ वि॒ज्ञानं॑ दर्॒शा दृ॒ष्टेति॑ ।

ए॒ता-व॒नुवा॒कौ पूर्॒वप॒क्षस्या॑-हो॒रात्राणां॑ नाम॒धेयानि॑ ।

प्र॒स्तुतं॑ वि॒ष्टुतं॑ सु॒ता सु॒न्वतीति॑ ।

ए॒ताव॒नु-वा॒काव॑-पर॒पक्ष॑स्या-हो॒रात्राणां॑ नाम॒धेयानि॑ ।

नाहो॑रात्रेष्वा-र्तिमा॒र्च्छति॑ । य ए॒वं वेद॑ ॥ 39 (10)

T.B.3.10.10.3

यो ह॒ वै मु॒हूर्तानां॑ नाम॒धेयानि॑ वेद । न मु॒हूर्तेष्वा॑-र्तिमा॒र्च्छति॑ ।

चि॒त्रः के॒तुर्दा॑ता प्र॒दाता॑ स॒विता॑ प्र॒सवि॑ता ऽभि॒शास्ता॑ ऽनु॒मन्तेति॑ ।

ए॒तेऽनु॒वा॒का मु॒हूर्तानां॑ नाम॒धेयानि॑ ।

न मु॒हूर्ते॑ष्वा-र्ति॒मा॒र्च्छ॑ति । य ए॒वं वे॑द ॥

यो ह॒ वा अ॑र्द्धमा॒सा-नाञ्च॑ मा॒सानाञ्च॑ नाम॒धेया॑नि वे॒द ।

ना॒र्द्धमा॒सेषु॑ न मा॒सेष्वा-र्ति॒मा॒र्च्छ॑ति ।

प॒वि॒त्रं प॒वयि॑ष्यन्-थ्सह॑स्वान्-थ्सही॑यानरु॒णो ऽरु॒णर॑जा इति ।

ए॒तेऽनु॒वा॒का अ॑र्द्धमा॒सानाञ्च॑ मा॒सानाञ्च॑ नाम॒धेया॑नि । 40 (10)

T.B.3.10.10.4

ना॒र्द्धमा॒सेषु॑ न मा॒सेष्वा-र्ति॒मा॒र्च्छ॑ति । य ए॒वं वे॑द ॥

यो ह॒ वै य॑ज्ञक्र॒तूनां॑ च॒तूनां॑ च॒ सम्॑व॒त्सर॑स्य च॒ नाम॒धेया॑नि वे॒द ।

न य॑ज्ञक्र॒तुषु॑ न॒र्तुषु॑ न॒ सम्॑व॒त्सर॑ आ॒र्ति॒मा॒र्च्छ॑ति ।

अ॒ग्नि॒ष्टोम॑ उ॒क्थ्यो॑ऽग्नि॒र्ऋ॒तुः प्र॒जाप॑तिः॒ सम्॑व॒त्सर॑ इति ।

ए॒तेऽनु॒वा॒का य॑ज्ञक्र॒तूनां॑ च॒तूनां॑ च॒ सम्॑व॒त्सर॑स्य च॒ नाम॒धेया॑नि ।

न य॑ज्ञक्र॒तुषु॑ न॒र्तुषु॑ न॒ सम्॑व॒त्सर॑ आ॒र्ति॒मा॒र्च्छ॑ति ।

य ए॒वं वे॑द ॥ यो ह॒ वै मु॒हूर्तानां॑ मु॒हूर्तान्॑ वे॒द ।

न मु॒हूर्तानां॑ मु॒हूर्ते॑ष्वार्ति॒ मा॒र्च्छ॑ति () । 41 (10)

T.B.3.10.10.5

इ॒दानीं॑ त॒दानी॑मि॒ति । ए॒ते वै मु॒हूर्तानां॑ मु॒हूर्ताः॑ ।
न मु॒हूर्तानां॑ मु॒हूर्ते॑ष्वा॒र्ति-मा॒र्च्छति॑ । य ए॒वं वे॒द ॥
अथो॒ यथा॑ क्षे॒त्रज्ञो॑ भू॒त्वा ऽनु॑ प्र॒विश्या॑न्न-म॒त्ति ।
ए॒वमे॒वैतान्॑ क्षे॒त्रज्ञो॑ भू॒त्वा ऽनु॑ प्र॒विश्या॑-न्नम॒त्ति ।
स ए॒तेषामे॒व स॒लो॒कता॑ ॐ सा॒युज्य॑-म॒श्नुते॑ ।
अप॑ पुन॒र्मृत्युं॑ ज॒यति॑ । य ए॒वं वे॒द ॥ 42 (9)

(न वे॒दै - वं वे॒दा - नुवा॒का अ॒र्द्धमा॒सानां॑ च म॒सानां॑ च ना॒मधेया॑नि
- मु॒हूर्ते॑ष्वा॒र्तिमा॒र्च्छति॑ - +न॒व च) (A10)

Special Korvai

(इ॒यम॑हो॒रात्रा॑णां स॒ंज्ञानं॑ पू॒र्वप॒क्षस्य॑ प्र॒स्तुत॑म॒परप॒क्षस्य॑ मु॒हूर्तानां॑
चि॒त्रः के॒तुर॒र्द्धमा॒सानां॑ प॒वित्रं॑ य॒ज्ञक्र॒तूना॑म॒ग्निष्टो॒मो य॒ज्ञक्र॒तूना॑मि
दानीं॑ मु॒हूर्तानां॑ मु॒हूर्तान्॑ वे॒देदानी॑मथो द्वा॒दश॑)

**3.10.11 अनुवाकं 11 – अनुवाकेषु नवसु लेखासु नाभ्यां चेष्टकोपधानं
स्वयमातृणोपधानं चोच्यते**

T.B.3.10.11.1

कश्चि॑द्ध॒वा अ॒स्मा-ल्लो॒कात् प्रेत्य॑ । आ॒त्मानं॑ वे॒द ।
अय॑-म॒ह-मस्मी॑ति । कश्चि॑त्स्वं लो॒कं न प्र॒ति प्र॒जाना॑ति ॥
अग्नि॑मुग्धो है॒व धु॒मतान्तः॑ । स्वं लो॒कं न प्र॒ति प्र॒जाना॑ति ।
अथ॑ यो है॒वैत-म॒ग्निं सा॒वित्रं॑ वे॒द ।
स ए॒वास्मा॑ ल्लो॒कात् प्रेत्य॑ । आ॒त्मानं॑ वे॒द ।
अय॑-म॒ह-मस्मी॑ति । 43 (10)

T.B.3.10.11.2

स स्वं लो॒कं प्र॒ति प्र॒जाना॑ति ॥ ए॒ष उ वे॒वैनं॑ तथ्सा॒वित्रः॑ ।
स्वर्गं॑ लो॒क-म॒भिव॑हति ॥ अ॒हो॒रात्रै॑ वा इ॒दं स॒युग्भिः॑ क्रियते ।
इति॑ रा॒त्राया॑ दी॒क्षिष॑त । इति॑ रा॒त्राय॑ व्र॒त-मु॒पागु॑रिति ।
तानि॑ हा॒नेवं वि॒दुषः॑ । अ॒मुष्मिन्॑ लो॒के शो॒वधिं॑ ध॒यन्ति॑ ।
धी॒तं है॒व स शो॒वधि-म॒नुप॑रैति ॥
अथ॑ यो है॒वैत॒मग्निं॑ सा॒वित्रं॑ वे॒द । 44 (10)

T.B.3.10.11.3

तस्य॑ है॒वा-हो॑रा॒त्राणि॑ । अ॒मुष्मिन्॑ लो॒के शे॑व॒धिं न ध॑यन्ति ।
अधी॑तः है॒व स शे॑व॒धि-मनु॑परैति ॥
भर॑द्वा॒जो ह त्रि॑भि॒रायु॑र्भि ब्र॒ह्मच॑र्यमु॒वास ।
तः॑ ह जी॒र्णिः स्थ॑वि॒रः श्या॑नं ।
इन्द्र॑ उप॒व्रज्यो॑ वाच । भर॑द्वा॒ज । यत्ते॑ चतु॒र्थमायु॑र्द॒द्यां ।
किमे॑नेन कुर्या॒ इति॑ । ब्र॒ह्मच॑र्यमे॒वैन॑ेन चरे॒यमि॑ति होवाच । 45 (10)

T.B.3.10.11.4

तः॑ ह त्रीन् गि॒रि-रू॒पान॑ वि॒ज्ञाता॑निव दर्श॒यां च॑कार ।
तेषा॑ं है॒कैक॑स्मान् मु॒ष्टिनाऽऽद॑दे । स होवाच ।
भर॑द्वा॒जेत्या॒मन्त्र्य॑ । वेदा॒ वा ए॒ते । अन॑न्ता वै वेदाः ॥
एत॑द्वा ए॒तै स्त्रि॑भि-रायु॑र्भि-रन्ववोच॒थाः ।
अथ॑ त इ॒तर-द॑ननू॒क्तमे॒व । एही॑मं वि॒द्धि ।
अयं॑ वै स॒र्व वि॒द्येति॑ । 46 (10)

T.B.3.10.11.5

तस्मै॑ है॒तम॒ग्निः सा॑वि॒त्रमु॒वाच । तः॑ स वि॒दित्वा॑ ।
अमृ॑तो भू॒त्वा । स्व॒र्गं लो॒कमि॑याय । आ॒दि॒त्यस्य॑ सायु॒ज्यं ॥

अ॒मृ॒तो॑ है॒व भू॒त्वा । स्व॒र्गं लो॒कमे॑ति । आ॒दि॒त्यस्य॑ सा॒यु॒ज्यं ।

य ए॒वं वै॑द ॥ ए॒षो ए॒व त्रयी॑ वि॒द्या । 47 (10)

T.B.3.10.11.6

याव॑न्त॒ऽह वै॑ त्र॒य्या वि॒द्यया॑ लो॒कं ज॑यति । ताव॑न्तं लो॒कं ज॑यति ।

य ए॒वं वै॑द ॥ अ॒ग्ने र्वा ए॒तानि॑ ना॒मधे॑यानि ।

अ॒ग्नेरे॒व सा॒यु॒ज्य॒ऽस॒लो॒कता॑-मा॒प्नोति॑ ।

य ए॒वं वै॑द । वा॒यो र्वा ए॒तानि॑ ना॒मधे॑यानि ।

वा॒योरे॒व सा॒यु॒ज्य॒ऽस॒लो॒कता॑-मा॒प्नोति॑ ।

य ए॒वं वै॑द । इ॒न्द्रस्य॑ वा ए॒तानि॑ ना॒मधे॑यानि । 48 (10)

T.B.3.10.11.7

इ॒न्द्रस्यै॒व सा॒यु॒ज्य॒ऽस॒लो॒कता॑-मा॒प्नोति॑ । य ए॒वं वै॑द ।

बृ॒ह॒स्प॒ते र्वा ए॒तानि॑ ना॒मधे॑यानि ।

बृ॒ह॒स्प॒तेरे॒व सा॒यु॒ज्य॒ऽस॒लो॒कता॑-मा॒प्नोति॑ ।

य ए॒वं वै॑द । प्र॒जाप॑ते र्वा ए॒तानि॑ ना॒मधे॑यानि ।

प्र॒जाप॑तेरे॒व सा॒यु॒ज्य॒ऽस॒लो॒कता॑-मा॒प्नोति॑ । य ए॒वं वै॑द ।

ब्र॒ह्म॒णो वा ए॒तानि॑ ना॒मधे॑यानि ।

ब्र॒ह्म॒ण॒ ए॒व सा॒यु॒ज्य॑ꣳ स॒लो॒क॒ता॒-मा॒प्नो॒ति॑ () ।
य॒ ए॒वं वै॒द॑ ॥ स॒ वा ए॒षोऽग्नि॑-र॒पक्ष॑पु॒च्छो वा॒यु॒रे॒व ।
तस्या॒ग्नि॒ मु॒खं॑ ॥ अ॒सा॒वादि॒त्यः॑ शि॒रः॑ । स॒ यदे॒ते दे॒वते॑ अ॒न्त॒रे॒ण ।
तथ्सर्व॑ꣳ सी॒व्य॒ति॑ । तस्मा॑त् सा॒वि॒त्रः॑ ॥ 49 (17)

(अ॒य॒म॒ह॒म॒स्मी॒ति॑ - वे॒द॑ - हो॒वाच॑ - स॒र्व॒वि॒द्ये॒ति॑ - वि॒द्ये -
न्द्र॑स्य॒ वा ए॒तानि॑ ना॒म॒धेया॑नि - ब्र॒ह्म॒ण॒ ए॒व सा॒यु॒ज्य॑ꣳ
स॒लो॒क॒ता॒मा॒प्नो॒ति॑ स॒प्त॒ च॑) । (A11)

=====

Special Korvai

(अ॒ग्ने॒र्वा॒यो॒रि॒न्द्र॑स्य॒ बृ॒ह॒स्प॒तेः॑ प्र॒जा॒प॒ते॒र् ब्र॒ह्म॒णः॑ स॒ वै स॒प्त॑)

Prapaataka Korvai with starting Padams of 1 to 10 Anuvaakams :-

(सं॒ज्ञा॒नं॑ - भू - स्त्व॒मे॒व - स॒म्व॑त्स॒रोऽसि॑ - भू - रा॒ज्य -
स॒व-वि॑प॒श्चिते॑ - प्र॒जा॒प॒ति॒र् दे॒वा - नि॒यं वा॑व स॒र॒घा -
क॒श्चि॒द्धै॒का॒द॒श॑)

तैत्तिरीय ब्राह्मणम् – (TB 3.10)

Korvai with starting Padams of 1, 11, 21 Series of Dasinis :-

(सं॒ज्ञान॑ꣳ – रा॒ज्ञी॑ – मूर्॒द्धा हृ॒दय॑ – ए॒ष स॒म्'व॑त्स॒रो –
ना॒र्द्ध॑मा॒सेषु॑ न॒वच॑त्वारि॒ंशत्)

First and Last Padam 1st Prapaatakam of Kaatakam:-

(सं॒ज्ञान॑ꣳ – सा॒वि॒त्रः)

॥ हरिः॑ ओं ॥

॥ इति तैत्तिरीय यजुर्ब्राह्मणे काठके प्रथमः प्रश्नः समाप्तः ॥

काठके प्रथमः प्रश्नः – (TB 3.10)

3.10 For Kaatakam 1 - (TB 3.10)

	Dasini	Vaakyams
Anuvakam 1	4	43
Anuvakam 2	1	16
Anuvakam 3	1	19
Anuvakam 4	3	37
Anuvakam 5	1	14
Anuvakam 6	1	7
Anuvakam 7	1	11
Anuvakam 8	10	98
Anuvakam 9	15	155
Anuvakam 10	5	49
Anuvakam 11	7	77
Total →	49	526

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

3. कृष्ण यजुर्वेदीय तैत्तिरीय ब्राह्मणे तृतीयाष्टकं

3.11 तैत्तिरीय यजुर्ब्राह्मणे काठके द्वितीयः प्रश्नः नाचिकेतचयनम्

3.11.1 अनुवाकं 1 – इष्टकोपधानमन्त्राः

T.B.3.11.1.1

लो॒को॒ऽसि॒ स्वर्गो॑ऽसि॒ । अन॒न्तो॑ऽस्य॒ पारो॑ऽसि॒ ।

अक्षि॑तोऽस्य॒ क्षय्यो॑ऽसि॒ । तप॑सः॒ प्रति॑ष्ठा । त्वयी॒दम॑न्तः॒ ।

विश्वं॑ य॒क्षं य॑ विश्वं॑ भू॒तं विश्व॑ः सु॒भूतं॑ ।

विश्व॑स्य॒ भर्ता॑ विश्व॑स्य॒ जन॑यिता । तन्त्वो॑प॒दधे॑ का॒मदु॒घ-म॑क्षितं ।

प्र॒जाप॑तिस्त्वा सा॒दय॑तु । तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 1 (10)

T.B.3.11.1.2

तपो॑ऽसि॒ लोके॑ श्रि॒तं । तेज॑सः॒ प्रति॑ष्ठा । त्वयी॒दम॑न्तः॒ ।

विश्वं॑ य॒क्षं य॑ विश्वं॑ भू॒तं विश्व॑ः सु॒भूतं॑ ।

विश्व॑स्य॒ भर्तृ॑ विश्व॑स्य॒ जन॑यितृ ।

तत् त्वो॑प॒दधे॑ का॒मदु॒घ-म॑क्षितं ।

प्र॒जाप॑तिस्त्वा सादयतु ।

तया॑ दे॒वतया॑-ऽङ्गि॒रस्वद्-ध्रु॒वा सी॑द ॥ 2 (8)

T.B.3.11.1.3

तेजो॑ऽसि तप॑सि श्रि॒तं । स॒मु॒द्रस्य॑ प्र॒तिष्ठा ।

त्वयी॑दमन्तः । वि॒श्वं य॑क्षं वि॒श्वं भू॒तं वि॒श्वं सु॒भूतं ।

वि॒श्वस्य॑ भ॒र्तृवि॒श्वस्य॑ ज॒नयि॑तृ । तत् त्वो॑प॒दधे॑ का॒मदु॒घ-म॑क्षि॒तं ।

प्र॒जाप॑तिस्त्वा सादयतु । तया॑ दे॒वतया॑-ऽङ्गि॒रस्वद्-ध्रु॒वा सी॑द ॥ 3 (8)

T.B.3.11.1.4

स॒मु॒द्रो॑ऽसि तेज॑सि श्रि॒तः । अ॒पां प्र॒तिष्ठा । त्वयी॑दमन्तः ।

वि॒श्वं य॑क्षं वि॒श्वं भू॒तं वि॒श्वं सु॒भूतं ।

वि॒श्वस्य॑ भ॒र्ता वि॒श्वस्य॑ ज॒नयि॑ता । तं त्वो॑प॒दधे॑ का॒मदु॒घ-म॑क्षि॒तं ।

प्र॒जाप॑तिस्त्वा सादयतु । तया॑ दे॒वतया॑-ऽङ्गि॒रस्वद्-ध्रु॒वा सी॑द ॥ 4 (8)

T.B.3.11.1.5

आपः॑ स्थ स॒मु॒द्रे श्रि॒ताः । पृ॒थि॒व्याः प्र॒तिष्ठा॑ युष्मा॒सु ।

इ॒दमन्तः॑ । वि॒श्वं य॑क्षं वि॒श्वं भू॒तं वि॒श्वं सु॒भूतं ।

वि॒श्वस्य॑ भ॒र्त्र्यो वि॒श्वस्य॑ ज॒नयि॑त्र्यः ।

ता॒ व॒ उप॑द॒धे का॒म॒दु॒घा अ॒क्षि॒ताः । प्र॒जा॒प॒ति॒स्त्वा सा॒दय॑तु ।

तया॑ दे॒व॒तया॑-ऽङ्गि॒र॒स्वद्-ध्रु॒वा सी॑द ॥ 5 (8)

T.B.3.11.1.6

पृ॒थि॒व्य-स्य॑प्सु श्रि॒ता । अ॒ग्नेः प्र॑ति॒ष्ठा । त्वयी॑द॒म॒न्तः ।

वि॒श्वं यँ॑क्षं वि॒श्वं भू॑तं वि॒श्वञ् सु॑भू॒तं ।

वि॒श्वस्य॑ भ॒र्त्री वि॒श्वस्य॑ ज॒नयि॑त्री । तां त्वो॑प॒द॒धे का॒म॒दु॒घा-म॒क्षि॒तां ।

प्र॒जा॒प॒ति॒स्त्वा सा॒दय॑तु । तया॑ दे॒व॒तया॑-ऽङ्गि॒र॒स्वद्-ध्रु॒वा सी॑द ॥ 6 (8)

T.B.3.11.1.7

अ॒ग्नि॒र॒सि पृ॒थि॒व्याञ् श्रि॒तः । अ॒न्त॒रि॒क्षस्य॑ प्र॑ति॒ष्ठा ।

त्वयी॑द॒म॒न्तः । वि॒श्वं यँ॑क्षं वि॒श्वं भू॑तं वि॒श्वञ् सु॑भू॒तं ।

वि॒श्वस्य॑ भ॒र्ता वि॒श्वस्य॑ ज॒नयि॑ता । तं त्वो॑प॒द॒धे का॒म॒दु॒घा-म॒क्षि॒तं ।

प्र॒जा॒प॒ति॒स्त्वा सा॒दय॑तु । तया॑ दे॒व॒तया॑-ऽङ्गि॒र॒स्वद्-ध्रु॒वा सी॑द ॥ 7 (8)

T.B.3.11.1.8

अ॒न्त॒रि॒क्ष-म॒स्य॒ग्नौ श्रि॒तं । वा॒योः प्र॑ति॒ष्ठा । त्वयी॑द॒म॒न्तः ।

वि॒श्वं यँ॑क्षं वि॒श्वं भू॑तं वि॒श्वञ् सु॑भू॒तं ।

वि॒श्वस्य॑ भ॒र्तृ वि॒श्वस्य॑ ज॒नयि॑तृ ।

तत् त्वोपदधे कामदुघ-मक्षितं । प्रजापतिस्त्वा सादयतु ।
तया देवतया-ऽङ्गिरस्वद्-ध्रुवा सीद ॥ 8 (8)

T.B.3.11.1.9

वायुरस्यन्तरिक्षे श्रितः । दिवः प्रतिष्ठा । त्वयीदमन्तः ।
विश्वं यक्षं विश्वं भूतं विश्वं सुभूतं ।
विश्वस्य भर्ता विश्वस्य जनयिता ।

तं त्वोपदधे कामदुघ-मक्षितं । प्रजापतिस्त्वा सादयतु ।
तया देवतया-ऽङ्गिरस्वद्-ध्रुवा सीद ॥ 9 (8)

T.B.3.11.1.10

द्यौरसि वायौ श्रिता । आदित्यस्य प्रतिष्ठा । त्वयीदमन्तः ।
विश्वं यक्षं विश्वं भूतं विश्वं सुभूतं ।
विश्वस्य भर्त्री विश्वस्य जनयित्री ।

तां त्वोपदधे कामदुघा-मक्षितां । प्रजापतिस्त्वा सादयतु ।
तया देवतया-ऽङ्गिरस्वद्-ध्रुवा सीद ॥ 10 (8)

T.B.3.11.1.11

आदित्योऽसि दिवि श्रितः । चन्द्रमसः प्रतिष्ठा । त्वयीदमन्तः ।
विश्वं यक्षं विश्वं भूतं विश्वं सुभूतं ।

वि॒श्वस्य॑ भ॒र्ता वि॒श्वस्य॑ ज॒नयि॑ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 11 (8)

T.B.3.11.1.12

च॒न्द्रमा॑ अ॒स्यादि॒त्ये श्रि॒तः । नक्ष॑त्राणां प्र॒तिष्ठा॑ । त्वयी॑द॒मन्तः॑ ।
वि॒श्वं य॑क्षं वि॒श्वं भू॒तं वि॒श्वं सु॑भू॒तं ।
वि॒श्वस्य॑ भ॒र्ता वि॒श्वस्य॑ ज॒नयि॑ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 12 (8)

T.B.3.11.1.13

नक्ष॑त्राणि स्थ च॒न्द्रम॑सि श्रि॒तानि॑ । स॒म्व॑त्स॒रस्य॑ प्र॒तिष्ठा॑ यु॒ष्मासु॑ ।
इ॒दम॑न्तः । वि॒श्वं य॑क्षं वि॒श्वं भू॒तं वि॒श्वं सु॑भू॒तं ।
वि॒श्वस्य॑ भ॒र्तृणि॑ वि॒श्वस्य॑ ज॒नयि॑तृणि ।
तानि॑ व॒ उप॑दधे॑ का॒मदु॒घा-न्य॑क्षि॒तानि॑ । प्र॒जाप॑तिस्त्वा सा॒दय॑तु ।
तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 13 (8)

T.B.3.11.1.14

सम्॑व॒थ्सरो॑ऽसि नक्ष॑त्रेषु श्रि॒तः । ऋ॒तूनां॑ प्र॒तिष्ठा । त्वयी॑दम॒न्तः ।
विश्वं॑ य॒क्षं य॑क्षं विश्वं॑ भू॒तं विश्व॑ सु॒भूतं ।
विश्व॑स्य भ॒र्ता विश्व॑स्य जनयि॒ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 14 (8)

T.B.3.11.1.15

ऋ॒तवः॑ स्थ॒ सम्॑व॒थ्सरे॑ श्रि॒ताः । मा॒सानां॑ प्र॒तिष्ठा यु॒ष्मासु॑ ।
इ॒दम॒न्तः । विश्वं॑ य॒क्षं य॑क्षं विश्वं॑ भू॒तं विश्व॑ सु॒भूतं ।
विश्व॑स्य भ॒र्तारो॑ विश्व॑स्य जनयि॒तारः ।
तान् व॒ उप॑दधे॑ का॒मदु॒घा-न॑क्षि॒तान् । प्र॒जाप॑तिस्त्वा सा॒दय॑तु ।
तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 15 (8)

T.B.3.11.1.16

मा॒साः स्थ॑र्तुषु श्रि॒ताः । अ॒र्द्धमा॒सानां॑ प्र॒तिष्ठा यु॒ष्मासु॑ ।
इ॒दम॒न्तः । विश्वं॑ य॒क्षं य॑क्षं विश्वं॑ भू॒तं विश्व॑ सु॒भूतं ।
विश्व॑स्य भ॒र्तारो॑ विश्व॑स्य जनयि॒तारः ।

तान्॑ व॒ उप॑दधे काम॒दु॒घा॒-नक्षि॑तान् । प्र॒जाप॑तिस्त्वा सादयतु ।
तया॑ दे॒वत॑या-ऽङ्गिर॒स्वद्-ध्रु॒वा सी॑द ॥ 16 (8)

T.B.3.11.1.17

अ॒र्द्ध॒मा॒साः स्थ॑ मा॒सु श्रि॒ताः । अ॒हो॒रा॒त्र्यौः प्र॒तिष्ठा॑ युष्मा॒सु ।
इ॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
वि॒श्वस्य॑ भ॒र्तारो॑ वि॒श्वस्य॑ ज॒नयि॑तारः ।

तान्॑ व॒ उप॑दधे काम॒दु॒घा॒-नक्षि॑तान् । प्र॒जाप॑तिस्त्वा सादयतु ।
तया॑ दे॒वत॑या-ऽङ्गिर॒स्वद्-ध्रु॒वा सी॑द ॥ 17 (8)

T.B.3.11.1.18

अ॒हो॒रा॒त्रे स्थो॑ऽर्द्ध॒मा॒सेषु॑ श्रि॒ते । भू॒तस्य॑ प्र॒तिष्ठे॑ भ॒व्यस्य॑ प्र॒तिष्ठे॑ ।
यु॒वयो॑-रि॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
वि॒श्वस्य॑ भ॒र्त्र्यो वि॒श्वस्य॑ ज॒नयि॑त्र्यौ । ते वा॒मुप॑दधे काम॒दु॒घे अक्षि॑ते ।
प्र॒जाप॑तिस्त्वा सादयतु । तया॑ दे॒वत॑या-ऽङ्गिर॒स्वद्-ध्रु॒वा सी॑द ॥ 18 (8)

T.B.3.11.1.19

पौ॒र्ण॒मा॒स्यष्ट॑का ऽमा॒वास्या॑ । अ॒न्ना॒दाः स्थान्ना॒दु॒घो युष्मा॒सु ।
इ॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
वि॒श्वस्य॑ भ॒र्त्र्यो वि॒श्वस्य॑ ज॒नयि॑त्र्यः ।

ता॒ व॒ उप॑द॒धे काम॑दु॒घा-अ॒क्षि॑ताः । प्र॒जाप॑तिस्त्वा सादयतु ।

तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 19 (8)

T.B.3.11.1.20

राड॑सि बृ॒हती॑ श्रीर॒सीन्द्र॑पत्नी॒ धर्म॑पत्नी । वि॒श्वं भू॒तम॑नु प्र॒भूता॑ ।

त्वयी॑दमन्तः । वि॒श्वं य॒क्षं वि॒श्वं भू॒तं वि॒श्वं सु॒भूतं॑ ।

वि॒श्वस्य॑ भ॒र्त्री वि॒श्वस्य॑ जनयित्री । तां त्वो॑पद॒धे काम॑दु॒घा-म॒क्षि॑तां ।

प्र॒जाप॑तिस्त्वा सादयतु । तया॑ दे॒वत॑या-ऽङ्गि॒रस्व॑द्-ध्रु॒वा सी॑द ॥ 20 (8)

T.B.3.11.1.21

ओजो॑ऽसि स॒होऽसि॑ । ब॒लम॑सि भ्राजो॑ऽसि ।

दे॒वानां॑ धा॒मामृ॑तं ॥ अ॒मर्त्य॑-स्तपो॒जाः । त्वयी॑दमन्तः ।

वि॒श्वं य॒क्षं वि॒श्वं भू॒तं वि॒श्वं सु॒भूतं॑ ।

वि॒श्वस्य॑ भ॒र्ता वि॒श्वस्य॑ जनयिता ।

तं त्वो॑पद॒धे काम॑दु॒घा-म॒क्षि॑तं । प्र॒जाप॑तिस्त्वा सादयतु ।

तया॑ दे॒वत॑या-ऽङ्गि॒रस्व॑द्-ध्रु॒वा सी॑द () ॥ 21 (10)

लो॒क – स्त॒प – स्तेजः॑ – स॒मु॒द्र – आपः॑ – पृ॒थि॒व्य – ग्नि –
रन्त॑रि॒क्षम् – वा॒युर् – द्यौ – रा॒दि॒त्य – श्र॒न्द्र॒मा – नक्ष॑त्राणि –
सम्॑व॒त्स॒र – ऋ॒त॒वो – मा॒सा – अर्द्ध॑मा॒सा – अ॒हो॒रा॒त्रे –
पौ॒र्ण॒मा॒सी – रा॒ड – स्यो॒जो॒ऽस्येक॑विं॒शतिः॑ (A1)

Special Korvai

लो॒को॒ऽसि॑ भ॒र्ता तम् । तप॑स्तेजो॒ऽसि॑ भ॒र्तृ तत् ।
स॒मु॒द्रो॒ऽसि॑ भ॒र्ता तम् । आपः॑ स्थ भ॒र्त्य॑स्ता वः ।
पृ॒थि॒वी भ॒र्त्री ताम् ।
अ॒ग्नि॒र॒सि॑ भ॒र्ता तम् । अ॒न्त॒रि॒क्षं भ॒र्तृ तत् । वा॒यु॒र॒सि॑ भ॒र्ता तम् ।
द्यौ॒र॒सि॑ भ॒र्त्री ताम् ।
आ॒दि॒त्यश्च॒न्द्र॒मा भ॒र्ता तम् । नक्ष॑त्राणि स्थ भ॒र्तृ॒णि तानि॑ वः ।
सम्॑व॒त्स॒रो॒ऽसि॑ भ॒र्ता तम् ।
ऋ॒त॒वो मा॒सा अर्द्ध॑मा॒सा भ॒र्तार॑स्तान् वः ।
अ॒हो॒रा॒त्रे भ॒र्त्यो॑ ते वा॒म् । पौ॒र्ण॒मा॒सी भ॒र्त्य॑स्ता वः ।
रा॒ड॒सि॑ भ॒र्त्री ताम् । ओ॒जो॒ऽसि॑ भ॒र्ता तमे॑कविं॒शतिः॑ ।

3.11.2 अनुवाकं 2 –चतुर्भिरनुवाकैः चतस्र आहुतीर्जुहोति

T.B.3.11.2.1

त्वमग्ने रुद्रो असुरो महो दिवः । त्वञ् शब्दो मारुतं पृक्ष ईशिषे ।
त्वं वातैररुणैर्यासि शंगयः । त्वं पूषा विधतः पासि नु त्मना ।
देवा देवेषु श्रयद्ध्वं । प्रथमा द्वितीयेषु श्रयद्ध्वं ।
द्वितीया-स्तृतीयेषु श्रयद्ध्वं । तृतीया-श्चतुर्थेषु श्रयद्ध्वं ।
चतुर्थाः पञ्चमेषु श्रयद्ध्वं । पञ्चमाः षष्ठेषु श्रयद्ध्वं । 22 (10)

T.B.3.11.2.2

षष्ठाः सप्तमेषु श्रयद्ध्वं । सप्तमा अष्टमेषु श्रयद्ध्वं ।
अष्टमा नवमेषु श्रयद्ध्वं । नवमा दशमेषु श्रयद्ध्वं ।
दशमा एकादशेषु श्रयद्ध्वं । एकदशा द्वादशेषु श्रयद्ध्वं ।
द्वादशा-स्त्रयोदशेषु श्रयद्ध्वं ।
त्रयोदशा-श्चतुर्दशेषु श्रयद्ध्वं । चतुर्दशाः पञ्चदशेषु श्रयद्ध्वं ।
पञ्चदशाः षोडशेषु श्रयद्ध्वं । 23 (10)

T.B.3.11.2.3

षोडशाः सप्तदशेषु श्रयद्ध्वं । सप्तदशा अष्टादशेषु श्रयद्ध्वं ।
अष्टादशा एकान्नविंशेषु श्रयद्ध्वं ।

ए॒कान्न॒वि॒॒श॒ः॒ वि॒॒शेषु॑ श्रयद्ध्वं ।
वि॒॒श॒ः॒ एक॒वि॒॒शेषु॑ श्रयद्ध्वं ।
ए॒क॒वि॒॒श॒ः॒ द्वा॒वि॒॒शेषु॑ श्रयद्ध्वं ।
द्वा॒वि॒॒श॒ः॒ स्त्रयो॒वि॒॒शेषु॑ श्रयद्ध्वं ।
त्रयो॒वि॒॒श॒ः॒ चतुर्वि॒॒शेषु॑ श्रयद्ध्वं ।
चतुर्वि॒॒श॒ः॒ पञ्च॒वि॒॒शेषु॑ श्रयद्ध्वं ।
पञ्च॒वि॒॒श॒ः॒ षड्वि॒॒शेषु॑ श्रयद्ध्वं । 24 (10)

T.B.3.11.2.4

षड्वि॒॒श॒ः॒ सप्त॒वि॒॒शेषु॑ श्रयद्ध्वं ।
सप्त॒वि॒॒श॒ः॒ अष्टा॒वि॒॒शेषु॑ श्रयद्ध्वं ।
अष्टा॒वि॒॒श॒ः॒ एकान्न॒त्रि॒॒शेषु॑ श्रयद्ध्वं ।
ए॒कान्न॒त्रि॒॒श॒ः॒ स्त्रि॒॒शेषु॑ श्रयद्ध्वं ।
त्रि॒॒श॒ः॒ एक॒त्रि॒॒शेषु॑ श्रयद्ध्वं ।
ए॒क॒त्रि॒॒श॒ः॒ द्वा॒त्रि॒॒शेषु॑ श्रयद्ध्वं ।
द्वा॒त्रि॒॒श॒ः॒ स्त्रयस्त्रि॒॒शेषु॑ श्रयद्ध्वं ।
दे॒वास्त्रि॒रे॒काद॒शा॒ स्त्रि॒स्त्रयस्त्रि॒॒श॒ः॒ ।

उत्तरे॑ भवत॑ । उत्तर॑ व॒र्त्मान॑ उत्तर॑ स॒त्त्वानः॑ () ।

यत्काम॑ इ॒दं जु॒होमि॑ । तन्मे॑ स॒मृद्ध्यतां॑ ।

वय॑ꣳ स्याम॑ प॒तयो॑ र॒यीणां॑ । भूर्भुव॑स्वः स्वाहा ॥ 25 (14)

(षष्ठेषु॑ श्रयद्ध्वꣳ – षोडशेषु॑ श्रयद्ध्वꣳ – षड्विंशेषु॑ श्रयद्ध्वꣳ –
मुत्तर॑स॒त्त्वानश्च॑त्वारि॑ च) (A2)

3.11.3 अनुवाकं 3 –चतुर्भिरनुवाकैः चतस्र आहुतीर्जुहोति

T.B.3.11.3.1

अ॒ग्नावि॑ष्णू स॒जोष॑सा । इ॒मा वर्द्ध॑न्तु वा॒ङ्मिरः॑ ।

द्यु॒म्नैर्वा॑जै॒भि-रा॑गतं । रा॒ज्ञी वि॒राज्ञी॑ । स॒म्राज्ञी॑ स्व॒राज्ञी॑ ।

अ॒र्चिः शो॒चिः । तपो॑ ह॒रो भाः॑ । अ॒ग्निः सोमो॑ बृ॒हस्प॑तिः ।

वि॒श्वे दे॒वा भु॑वनस्य गो॒पाः । ते सर्वे॑ स॒ङ्ग॑त्य () ।

इ॒दं मे प्रा॑वता वचः । वय॑ꣳ स्याम॑ प॒तयो॑ र॒यीणां॑ ।

भूर्-भुव॑स्-स्वस् स्वाहा ॥ 26 (13)

(स॒ङ्ग॑त्य त्रीणि॑ च) (A3)

3.11.4 अनुवाकं 4 –चतुर्भिरनुवाकैः चतस्र आहुतीर्जुहोति

T.B.3.11.4.1

अ॒न्नप॑ते ऽन्नस्य॑ नो दे॒हि । अ॒न॒मी॒व॒स्य॑ शु॒ष्मि॒णः॑ ।
प्र॒प्र॒दा॒ता॒र॒न्ता॒रि॒षः॑ । ऊ॒र्जं॑ नो धे॒हि द्वि॒प॒दे च॑तु॒ष्प॒दे ।
अ॒ग्ने॑ पृ॒थि॒वी॒प॒ते । सोम॑ वी॒रु॒धां प॑ते । त्व॒ष्टः॑ स॒मि॒धां प॑ते ।
वि॒ष्ण॒वा॒शा॒नां प॑ते । मि॒त्र स॒त्या॒नां प॑ते । व॒रु॒ण ध॑र्म॒णां प॑ते । 27 (10)

T.B.3.11.4.2

म॒रु॒तो ग॑णा॒नां प॑तयः । रु॒द्र प॑शू॒नां प॑ते । इ॒न्द्रो॒ज॒सां प॑ते ।
बृ॒ह॒स्प॑ते ब्र॒ह्म॑णस्प॒ते । आ रु॒चा रो॒चेऽह॑ꣳ स्व॒यं ।
रु॒चा रु॒रु॒चे-रो॑च॒मानः॑ । अ॒ती॒त्या॒दः स्व॑राभ॒रेह॑ ।
तस्मि॒न् यो॒नौ प्र॑ज॒नौ प्र॑जा॒ये॒य । व॒यꣳ स्या॑म प॒तयो॑ र॒यी॒णां ।
भू॒र्भु॒वः स्वः॑ स्वा॒हा () ॥ 28 (10)

[व॒रु॒ण ध॑र्म॒णां प॑ते स्वः॑ – स्वा॒हा ()] (A4)

3.11.5 अनुवाकं 5 –चतुर्भिरनुवाकैः चतस्र आहुतीर्जुहोति

T.B.3.11.5.1

स॒प्त ते॑ अ॒ग्ने स॒मि॒धः स॒प्त जि॒ह्वाः॑ ।
स॒प्तर॑ष॒यः स॒प्त॒धा॒म प्रि॒या॒णि । स॒प्त हो॒त्रा अनु॑ वि॒द्वान् ।

स॒प्त यो॒नी-रा॒पृ॒ण॒स्वा घृ॒तेन॑ । प्रा॒ची दिक् । अ॒ग्नि दे॒वता॑ ॥
अ॒ग्नि॒ꣳ स दि॒शां दे॒वं दे॒वता॑ना-मृच्छतु । यो मै॒तस्यै॑
दि॒शो ऽभि॒दास॑ति । द॒क्षि॒णा दिक् । इन्द्रो॑ दे॒वता॑ ॥ 29 (10)

T.B.3.11.5.2

इन्द्र॑ꣳ स दि॒शां दे॒वं दे॒वता॑ना-मृच्छतु ।
यो मै॒तस्यै॑ दि॒शो ऽभि॒दास॑ति । प्र॒ती॒ची दिक् । सोमो॑ दे॒वता॑ ॥
सोम॑ꣳ स दि॒शां दे॒वं दे॒वता॑ना-मृच्छतु ।
यो मै॒तस्यै॑ दि॒शो ऽभि॒दास॑ति । उ॒दी॒ची दिक् । मि॒त्राव॑रु॒णौ दे॒वता॑ ॥
मि॒त्राव॑रु॒णौ स दि॒शां दे॒वौ दे॒वता॑ना-मृच्छतु ।
यो मै॒तस्यै॑ दि॒शो ऽभि॒दास॑ति । 30 (10)

T.B.3.11.5.3

ऊ॒र्ध्वा दिक् । बृ॒ह॒स्पति॑ दे॒वता॑ ॥
बृ॒ह॒स्पति॑ꣳ स दि॒शां दे॒वं दे॒वता॑ना-मृच्छतु ।
यो मै॒तस्यै॑ दि॒शो ऽभि॒दास॑ति । इ॒य॒न्दिक् । अ॒दि॒ति दे॒वता॑ ॥
अ॒दि॒तिꣳ स दि॒शां दे॒वीं दे॒वता॑ना-मृच्छतु ।

यो मै॒तस्यै॑ दि॒शो ऽभि॒दास॑ति ।

पुरु॑षो दिक् । पुरु॑षो मे॒ कामा॑न् थ्सम॑र्द्धयतु () । 31 (10)

T.B.3.11.5.4

अ॒न्धो जा॒गृविः॑ प्रा॒ण । अ॒सावे॑हि । ब॒धिर आ॑क्रन्द॒यित-र॑पान ।

अ॒सावे॑हि । उ॒षस॑-मु॒षस॑-म॒शीय॑ । अ॒हम॑सो ज्योति॑रशीय ।

अ॒हम॑सो ऽपो॑शीय । व॒यञ् स्या॑म प॒तयो॑ रयी॒णां ।

भूर्भुवः॑ स्वः स्वाहा ॥ 32 (9)

(दक्षि॑णा दि॒गिन्द्रो॑ दे॒वता॑ - मि॒त्रावरु॑णौ स दि॒शां दे॒वौ दे॒वता॑नामृच्छतु
यो मै॒तस्यै॑ दि॒शो ऽभि॒दा - स॑त्यर्द्धयतु - +नव॑ च) (A5)

3.11.6 अनुवाकं 6 -उपस्थानम्

T.B.3.11.6.1

यत्ते॑ऽचितं॒ यदु॑ चित॒न्ते अ॒ग्ने । यत्त॑ ऊ॒नं यदु॑ तेऽति॒रिक्तं॑ ।

आ॒दि॒त्यास्त॑-दङ्गि॒रस॑-श्चि॒न्वन्तु॑ । वि॒श्वे ते॑ दे॒वाश्चि॒ति-मा॑पूरयन्तु ।

चि॒तश्चा॑सि सञ्चि॒तश्चा॑-स्य॒ग्ने । ए॒तावा॑ञ्चा॒सि भू॒याञ्चा॑स्य॒ग्ने ॥

लो॒कं पृ॑ण च्छि॒द्रं पृ॑ण । अथो॑ सीद॒ शि॒वा त्वं॑ ।

इ॒न्द्रा॒ग्नी त्वा॑ बृ॒हस्प॑तिः । अ॒स्मिन् यो॑नावसीषदन् । 33 (10)

T.B.3.11.6.2

तया॑ दे॒वतया॑-ऽङ्गि॒रस्वद्-ध्रु॒वा सी॑द ॥ ता अ॒स्य सू॑द॒दोह॑सः ।
सोम॑ऽ श्री॒णन्ति॑ पृ॒श्नयः॑ । जन्मं॑ दे॒वानां॑ वि॒शः ।
त्रि॒ष्वा रो॑चने दि॒वः । तया॑ दे॒वतया॑-ऽङ्गि॒रस्वद्-ध्रु॒वा सी॑द ॥
अग्ने॑ दे॒वाऽ इ॒हाव॑ह । ज॒ज्ञानो॑ वृ॒क्त बर्हि॑षे ।
असि॑ होता न ई॒ड्यः॑ ॥ अग॑न्म म॒हा मन॑सा यवि॒ष्टं । 34 (10)

T.B.3.11.6.3

यो दी॒दाय॑ समि॒द्धः स्वे दु॑रो॒णे । चि॒त्रभा॑नू रो॒दसी॑ अ॒न्तरु॑र्वी ।
स्वा॒हुतं॑ वि॒श्वतः॑ प्र॒त्यञ्चं॑ ॥ मे॒धाका॑रं वि॒दथ॑स्य प्र॒साध॑नं ।
अ॒ग्निऽ हो॑तारं प॒रिभू॑तमं म॒तिं । त्वा॒मर्भ॑स्य ह॒विषः॑ स॒मान॑मि॒त् ।
त्वां म॒हो वृ॑णते न॒रो ना॒न्यं-त्व॑त् ॥ म॒नुष्व॑त्त्वा नि॒धीम॑हि ।
म॒नुष्व॑त् समि॒धीम॑हि । अग्ने॑ म॒नुष्व॑-द॒ङ्गिरः॑ । 35 (10)

T.B.3.11.6.4

दे॒वान् दे॒वाय॑ते यज ॥ अ॒ग्निर्हि॑ वा॒जिनं॑ वि॒शे ।
द॒दाति॑ वि॒श्वच॑र्षणिः ।
अ॒ग्नी रा॒ये स्वा॒भुवं॑ ॥ स प्री॒तो या॑ति वा॒र्यं॑ ॥ इ॒षऽ स्तो॑तृ॒भ्य आ॑भर ॥
पृ॒ष्ठो दि॒वि पृ॒ष्ठो अ॒ग्निः पृ॒थिव्यां॑ । पृ॒ष्ठो वि॒श्वा ओष॑धी-रा॒विवे॑श ।

वै॒श्वान॒रः स॒हसा॑ पृ॒ष्ठो अ॒ग्निः ।

स नो॒ दि॒वा स रि॒षः पा॒तु न॒क्तं () ॥ 36 (10)

[अ॒सी॒षद॒न्. – य॒वि॒ष्ठ – म॒ङ्गि॒रो – न॒क्तं ()] (A6)

3.11.7 अनुवाकं 7 – नाचिकेतब्राह्मणं तत्र आग्निदेवतोपासनम्

T.B.3.11.7.1

अयं॑ वा॒व यः प॒वते॑ । सो॒ऽग्नि॑ न॒चिके॑तः । स यत् प्रा॒ङ् प॒वते॑ ।

तद॒स्य शि॒रः । अथ॑ यद् दक्षि॒णा । स दक्षि॑णः पक्षः ।

अथ॑ यत् प्र॒त्यक् । तत् पु॒च्छं॑ । य दु॒दङ्ङ् । स उत्त॑रः पक्षः । 37 (10)

T.B.3.11.7.2

अथ॑ यथ् स॒म्व॑ति । तद॒स्य स॒मञ्च॑नं च प्र॒सार॑णं च ।

अथो॑ संप॒दे॒वास्य॑ सा ॥ स॒ꣳ ह॒ वा अ॒स्मै स॒ कामः॑ प॒द्यते॑ ।

यत् कामो॑ यज॒ते । यो॒ऽग्निं॑ न॒चिके॑तं चि॒नुते॑ ।

य उ॑ चैन॒-मे॒वं वे॑द ॥ यो ह॒ वा अ॒ग्ने न॒चिके॑तस्या॒यत॑नं

प्रति॑ष्ठां वे॑द । आ॒यत॑नवान् भवति । गच्छ॑ति प्रति॒ष्ठां । 38 (10)

T.B.3.11.7.3

हि॒रण्यं॑ वा॒ अ॒ग्ने न॒चिके॑तस्या॒यत॑नं प्रति॒ष्ठा । य ए॒वं वे॑द ।

आ॒यत॑नवान् भवति । गच्छ॑ति प्रति॒ष्ठां ॥

यो ह वा अग्ने नाचिकेतस्य शरीरं वेद ।
स शरीर एव स्वर्गं लोकमेति ।
हिरण्यं वा अग्ने नाचिकेतस्य शरीरं ।
य एवं वेद । स शरीर एव स्वर्गं लोकमेति ॥
अथो यथा रुक्म उत्-तप्तो भाय्यात् । 39 (10)

T.B.3.11.7.4

एवमेव स तेजसा यशसा । अस्मिञ्च लोके-ऽमुष्मिञ्च भाति ॥
उरवो ह वै नामैते लोकाः । ये-ऽवरेणादित्यं ।
अथ हैते वरीयाञ्सो लोकाः । ये परेणादित्यं ।
अन्तवन्तञ् ह वा एष क्षय्यं लोकं जयति । यो-ऽवरेणादित्यं ।
अथ हैषो-ऽनन्त-मपार-मक्षय्यं लोकं जयति ।
यः परेणादित्यं () ॥ 40 (10)

T.B.3.11.7.5

अनन्तञ् ह वा अपार-मक्षय्यं लोकं जयति ।
योऽग्निं नाचिकेतं चिनुते । य उ चैन-मेवं वेद ॥
अथो यथा रथे तिष्ठन् पक्षसी पर्या-वर्तमाने प्रत्यपैक्षते ।

ए॒व-म॑हो॒रा॒त्रे प्र॒त्यपै॑क्षते ।

नास्या॑-हो॒रा॒त्रे लो॒कमा॑प्नुतः । योऽग्निं॑ ना॒चिके॑तं चि॒नुते॑ ।

य उ॑ चैन-मे॒वं वे॑द ॥ 41 (8) (उ॒त्तरः॑ प॒क्षो - गच्छ॑ति प्र॒तिष्ठां॑ -

भा॒य्याद् - यः॑ परे॒णादि॑त्य - +म॒ष्टौ च॑) (A7)

3.11.8 अनुवाकं 8 -नाचिकेतोपाख्यानम्

T.B.3.11.8.1

उ॒शन् ह॒ वै वा॑जश्र॒वसः॑ स॒र्ववे॑दसं ददौ ।

तस्य॑ ह॒ नचि॑के॒ता ना॑म पु॒त्र आ॑स । त॒ ह॒ कु॒मा॒र॒ सन्तं॑ ।

दक्षि॑णासु नी॒यमा॑नासु श्र॒द्धा ऽऽवि॑वेश । स हो॒वाच॑ ।

तत॑ कस्मै॑ मां दा॒स्यसी॑ति । द्वि॒तीयं॑ तृ॒तीयं॑ ॥ त॒ ह॒ परी॑त उवाच ।

मृ॒त्यवे॑ त्वा ददा॒मीति॑ ॥ त॒ ह॒ स्मोत्थि॑तं वा॒गभि॑वदति । 42 (10)

T.B.3.11.8.2

गौ॒तम॑ कु॒मा॒रमि॑ति । स हो॒वाच॑ । परे॑हि मृ॒त्यो गृ॑हान् ।

मृ॒त्यवे॑ वै त्वाऽदा॒-मि॑ति ॥ तं वै॑ प्र॒वस॑न्तं ग॒न्तासी॑ति होवाच ।

तस्य॑ स्म ति॒स्रो रा॒त्री-र॑ना॒श्वा॒न् गृ॑हे वसतात् । स यदि॑ त्वा पृ॒च्छेत् ।

कु॒मा॒र॒ क॒ति॒ रा॒त्री-र॒वा॒थ्सी-रि॒ति॒ । ति॒स्र इति॒ प्र॒ति॒ ब्रू॒तात् ।

किं प्र॒थ॒माꣳ रा॒त्रि-मा॒श्ना इति॑ । 43 (10)

T.B.3.11.8.3

प्र॒जां त इति॑ । किं द्वि॒तीया-मि॒ति॒ । प॒शूꣳस्त इति॑ ।

किं तृ॒तीया-मि॒ति॒ । सा॒धुकृ॒त्यां त इति॑ ॥ तं वै प्र॒व॒स॒न्तं ज॒गाम ।

तस्य॑ ह ति॒स्रो रा॒त्री-र॒नाश्वा॒न् गृ॒ह उ॒वास । त॒मा॒ग॒त्य प॒प्र॒च्छ ।

कु॒मा॒र॒ क॒ति॒ रा॒त्री-र॒वा॒थ्सी-रि॒ति॒ । ति॒स्र इति॒ प्र॒त्यु॒वाच॑ । 44 (10)

T.B.3.11.8.4

किं प्र॒थ॒माꣳ रा॒त्रि-मा॒श्ना इति॑ । प्र॒जां त इति॑ ।

किं द्वि॒तीया-मि॒ति॒ । प॒शूꣳस्त इति॑ । किं तृ॒तीया-मि॒ति॒ ।

सा॒धुकृ॒त्यां त इति॑ ॥ न॒म॒स्ते अ॒स्तु भ॒गव इति॑ हो॒वाच॑ ।

वरं॑ वृ॒णीष्वेति॑ ॥ पि॒तर॒मे॒व जी॒वन्न॒या॒नीति॑ ॥

द्वि॒तीयं॑ वृ॒णीष्वेति॑ । 45 (10)

T.B.3.11.8.5

इ॒ष्टा॒पूर्त॒यो मे॒ ऽक्षि॑तिं ब्रू॒हीति॑ हो॒वाच॑ ।

तस्मै॑ है॒त॒म॒ग्निं ना॒चि॒के॒त-मु॒वाच॑ ।

ततो॑ वै तस्यै-ष्टा॒पूर्ते॑ ना क्षी॒येते॑ ॥

नास्यै॑ष्टा-पू॒र्ते क्षी॑येते । योऽ॒ग्निं नाचि॑केतं चि॒नुते॑ ।

य उ॑ चैन-मे॒वं वे॑द ॥ तृ॒तीयं वृ॑णीष्वेति ।

पुन॑ मृ॒त्यो मे॑ ऽपजि॑तिं ब्रू॒हीति॑ होवाच ।

तस्मै॑ है॒तम॒ग्निं नाचि॑केत-मु॒वाच॑ ।

ततो॑ वै सोऽप पुन॑ मृ॒त्यु-मज॑यत् । 46 (10)

T.B.3.11.8.6

अप॑ पुन॑ मृ॒त्युं जय॑ति । योऽ॒ग्निं नाचि॑केतं चि॒नुते॑ ॥

य उ॑ चैन-मे॒वं वे॑द ॥ प्र॒जाप॑ति॒र्वै प्र॒जाका॑म-स्तपो॑-ऽतप्य॑त ।

स हि॑रण्य-मु॒दास्य॑त् । त-द॒ग्नौ प्रा॑स्यत् । त-द॒स्मै ना॑च्छदयत् ।

तद् द्वि॒तीयं प्रा॑स्यत् । त-द॒स्मै नै॒वा॑च्छदयत् ।

तत् तृ॒तीयं प्रा॑स्यत् । 47 (10)

T.B.3.11.8.7

त-द॒स्मै नै॒वा॑च्छदयत् । त-दा॒त्म-न्ने॒व हृ॑दय्यै॒ऽग्नौ वै॑श्वा॒नरे॑ प्रा॑स्यत् ।

त-द॒स्मा अ॑च्छदयत् । तस्मा॒द्धि॑रण्यं क॒निष्ठं॑ ध॒नानां॑ ।

भु॒ञ्जत् प्रि॒यत॑मं । हृ॒दय॑जꣳ हि । स वै तमे॒व ना॑विन्दत् ।

यस्मै॑ तां दक्षि॑णा-म॒नेष्य॑त् ।

ता७ स्वायै॒व ह॒स्ताय॑ दक्षि॒णायान॑यत् ।

तां प्रत्य॑गृह्णात् । 48 (10)

T.B.3.11.8.8

दक्षाय॑ त्वा दक्षि॒णां प्रति॑गृह्णामीति॑ । सो ऽदक्ष॑त दक्षि॒णां प्रति॑गृह्य ।

दक्ष॑ते ह॒ वै दक्षि॒णां प्रति॑गृह्य । य॒ एवं॑ वै॒दे॒ ॥

ए॒तद्ध॑ स्म॒ वै तद् वि॒द्वा॑ꣳसो वाज॑श्रव॒सा गो॑त॒माः ।

अ॒प्यनू॑दे॒श्यां दक्षि॒णां प्रति॑गृह्णन्ति॑ ।

उ॒भये॑न व॒यं दक्षि॑ष्याम॒ह ए॒व दक्षि॒णां प्रति॑गृह्येति॑ ।

ते ऽदक्ष॑न्त दक्षि॒णां प्रति॑गृह्य ।

दक्ष॑ते ह॒ वै दक्षि॒णां प्रति॑गृह्य । य॒ एवं॑ वै॒दे॒ () ।

प्र॒ हान्यं॑ ँली॒नाति॑ ॥ 49 (11)

(व॒द – त्या॒श॒ना इ॒त् – यु॒वाच॑ – द्वि॒तीयं॑ वृ॒णीष्वे॑ – त्य॒जय॑त् –

तृ॒तीयं॑ प्रा॒स्य – द॒गृह्णा॑द् – य॒ एवं॑ वै॒दैकं॑ च) (A8)

3.11.9 अनुवाकं 9 –चयनप्रयोगः

T.B.3.11.9.1

त॒ ऽ है॒त-मे॒के प॒शुब॒न्ध ए॒वोत्त॑रवे॒द्यां चि॑न्वते ।
उ॒त्त॒रवे॒दिस॑म्मित ए॒षोऽग्नि॑रिति॒ वद॑न्तः ।
तन्न॑ त॒था कु॑र्यात् । ए॒त-म॒ग्निं का॑मे॒न व्य॑र्द्धयेत् ।
स ए॒नं का॑मे॒न व्य॑र्द्धः । का॑मे॒न व्य॑र्द्धयेत् ।
सौ॒म्ये वा॒वै न॑म॒ध्वरे चि॑न्वीत । यत्र॑ वा भू॒यिष्ठा आ॑हु॒तयो हू॑येरन् ।
ए॒त-म॒ग्निं का॑मे॒न स॑म॒र्द्धय॑ति । स ए॒नं का॑मे॒न स॑म॒र्द्धः । 50 (10)

T.B.3.11.9.2

का॑मे॒न स॑म॒र्द्धय॑ति ॥ अथ॑ है॒नं पु॒रर्ष॑यः ।
उ॒त्त॒रवे॒द्या-मे॒व स॒त्रिय॑-म॒चि॑न्वत । ततो॒ वै तेऽवि॑न्दन्त प्र॒जां ।
अ॒भि स्व॑र्गं लो॒क-म॑जयन् । वि॒न्दत॑ ए॒व प्र॒जां ।
अ॒भि स्व॑र्गं लो॒कं ज॑यति । योऽग्निं॑ ना॒चिके॑तं चि॒नुते॑ ।
य उ॒ चैन॑-मे॒वं वे॑द ॥ अथ॑ है॒नं वा॒युर् ऋ॑द्धि॒कामः॑ । 51 (10)

T.B.3.11.9.3

य॒थान्यु॑प्त-मे॒वोप॑दधे । ततो॒ वै स ए॒ता-मृ॑द्धि-मा॒र्द्ध॑नोत् ।
या॒मिदं॑ वा॒युर् ऋ॑द्धः । ए॒ता-मृ॑द्धि-मृ॒द्ध॑नोति ।

यामिदं वा॒युर् ऋ॒द्धः । यो॑ऽग्निं॑ नाचि॒केतं॑ चि॒नुते॑ ।
य उ॑ चैन-मे॒वं वे॒द ॥ अथ॑ है॒नं गो॒ब॒लो वा॒र्ष्णाः प॒शु॒का॒मः ।
पा॒क्तमे॒व चि॒क्ये । पञ्च॑ पु॒रस्ता॑त् । 52 (10)

T.B.3.11.9.4

पञ्च॑ दक्षि॒णतः॑ । पञ्च॑ प॒श्चात् । पञ्चो॑त्तर॒तः । एकां॑ म॒द्ध्ये॑ ।
ततो॑ वै स स॒हस्रं॑ प॒शून् प्रा॒प्नो॑त् । प्र स॒हस्रं॑ प॒शू-ना॒प्नोति॑ ।
यो॑ऽग्निं॑ नाचि॒केतं॑ चि॒नुते॑ । य उ॑ चैन-मे॒वं वे॒द ॥
अथ॑ है॒नं प्र॒जाप॑ति॒ ज्यैष्ठ्य॑का॒मो यश॑स्का॒मः प्र॒जन॑नका॒मः ।
त्रि॒वृ॒तमे॒व चि॒क्ये । 53 (10)

T.B.3.11.9.5

स॒प्त पु॒रस्ता॑त् । ति॒स्रो दक्षि॒णतः॑ । स॒प्त प॒श्चात् । ति॒स्र उत्तर॑तः ।
एकां॑ म॒द्ध्ये॑ । ततो॑ वै स प्र यशो॑ ज्यैष्ठ्य॑-मा॒प्नो॑त् ।
ए॒तां प्र॒जातिं॑ प्रा॒जाय॑त । या॒मि॒दं प्र॒जाः प्र॒जाय॑न्ते ।
त्रि॒वृ॒द् वै ज्यैष्ठ्यं॑ । मा॒ता पि॒ता पु॒त्रः । 54 (10)

T.B.3.11.9.6

त्रि॒वृ॒त् प्र॒जन॑नं । उ॒प॒स्थो यो॒नि म॑द्ध्य॒मा ।
प्रय॑शो॒ ज्यैष्ठ्य॑-मा॒प्नोति॑ । ए॒तां प्र॒जातिं॑ प्र॒जाय॑ते ।

यामिदं प्रजाः प्रजायन्ते । योऽग्निं नाचिकेतं चिनुते ।
य उ चैनमेवं वेद ॥ अथ हैन-मिन्द्रो ज्यैष्ठ्यकामः ।
ऊर्ध्वा एवोपदधे । ततो वै स ज्यैष्ठ्य-मगच्छत् । 55 (10)

T.B.3.11.9.7

ज्यैष्ठ्यं गच्छति । योऽग्निं नाचिकेतं चिनुते ।
य उ चैन-मेवं वेद ॥ अथ हैन-मसावादित्यः स्वर्गकामः ।
प्राचीरेवोपदधे । ततो वै सोऽभि स्वर्गं लोक-मजयत् ।
अभि स्वर्गं लोकं जयति । योऽग्निं नाचिकेतं चिनुते ।
य उ चैन-मेवं वेद ॥ स यदीच्छेत् । 56 (10)

T.B.3.11.9.8

तेजस्वी यशस्वी ब्रह्मवर्चसी स्यामिति ।
प्राडा होतुर्द्विष्या-दुथ्सर्पेत् । येयं प्रागाद् यशस्वती ।
सा मा प्रोर्णोतु । तेजसा यशसा ब्रह्मवर्चसेनेति ।
तेजस्यैव यशस्वी ब्रह्मवर्चसी भवति ॥ अथ यदीच्छेत् ।
भूयिष्ठं मे श्रद्दधीरन् । भूयिष्ठा दक्षिणा नयेयुरिति ।

दक्षिणा॑सु नी॒यमा॑नासु प्रा॒च्येहि॑ प्रा॒च्येही॑ति प्रा॒ची जुषा॑णा वे॒त्वाज्य॑स्य
स्वा॒हेति॑ सु॒वेणो॑-प॒हत्या॑ ह॒वनी॑ये जुहुयात् । 57 (10)

T.B.3.11.9.9

भूयि॑ष्ठ-मे॒वास्मै॑ श्रद्द॑धते । भूयि॑ष्ठा दक्षि॑णा नयन्ति ॥
पु॒रीष॑-मु॒पधा॑य । चि॒ति-क्लृ॑प्तिभि॒-रभि॑मृश्य ।
अ॒ग्निं प्र॒णीयो॑पसमा॒धाय॑ । चत॑स्र ए॒ता आ॑हुती र्जु॒होति॑ ।
त्वम॑ग्ने रु॒द्र इति॑ श॒तरु॒द्रीय॑स्य रू॒पं ।
अ॒ग्ना-वि॑ष्णू इति॑ वसो॒र्द्धा॒रायाः॑ । अ॒न्नप॑त इत्य॒न्न हो॑मः ।
स॒प्त ते॑ अ॒ग्ने स॒मिधः॑ स॒प्त जि॒ह्वा इति॑ वि॒श्वप्रीः॑ () ॥ 58 (10)
[स॒मृद्ध - ऋ॒द्धि॑कामः - पु॒रस्ता॑च् - चि॒क्ये - पु॒त्रो - ऽग॑च्छ -
दि॒च्छे - जु॒हुयाद् - वि॒श्वप्रीः॑ ()] (A9)

Special Korvai

(पु॒रर्ष॑यो वा॒युर् गो॒बलः॑ स॒हस्रं॑ प्र॒जाप॑ति स्त्रि॒वृदि॒न्द्रो
ऽसा॑वा॒दित्यः॑ स यदी॒च्छेत्)

3.11.10 अनुवाकं 10 – तत्प्रशंसा

T.B.3.11.10.1

यां प्रथ॒मा-मि॒ष्टका॑-मु॒प॒दधा॑ति । इ॒मं तया॑ लो॒क-म॒भि ज॑यति ।

अथो॒ या अ॒स्मिन् लो॒के दे॒वताः॑ ॥

तासां॑ सायु॒ज्यं स॒लो॒कता॑-मा॒प्नोति॑ । यां द्वि॒तीया॑-मु॒प॒दधा॑ति ।

अ॒न्तरि॑क्षलो॒कं तया॑-ऽभि॒ जय॑ति । अथो॒ या अ॒न्तरि॑क्ष लो॒के दे॒वताः॑ ॥

तासां॑ सायु॒ज्यं स॒लो॒कता॑-मा॒प्नोति॑ ।

यां तृ॒तीया॑-मु॒प॒दधा॑ति ।

अमुं॑ तया॑ लो॒क-म॒भिज॑यति । 59 (10)

T.B.3.11.10.2

अथो॒ या अ॒मुष्मिन्॑ लो॒के दे॒वताः॑ ॥

तासां॑ सायु॒ज्यं स॒लो॒कता॑-मा॒प्नोति॑ ।

अथो॒ या अ॒मूरि॑तरा अष्टाद॒श ।

य ए॒वामी॑ उ॒रव॑श्च व॒रीया॑स्स॒च लो॒काः ।

ता॒नेव॑ ता॒भि-र॒भिज॑यति ॥

का॒म॒चा॒रो ह॒ वा अ॒स्यो॒रुषु॑ च॒ व॒रीय॑स्सु च लो॒केषु॑ भवति ।

योऽग्निं नाचिकेतं चिनुते । य उ चैन-मेवं वेद ॥

सम्वत्सरो वा अग्निर्नाचिकेतः । तस्य वसन्तः शिरः । 60 (10)

T.B.3.11.10.3

ग्रीष्मो दक्षिणः पक्षः । वर्षा उत्तरः । शरत् पुच्छं ॥

मासाः कर्मकाराः । अहोरात्रे शतरुद्रीयं । पर्जन्यो वसोर्द्धारा ॥

यथा वै पर्जन्यः सुवृष्टं वृष्ट्वा ।

प्रजाभ्यः सर्वान् कामान्त् संपूरयति ।

एव-मेव स तस्य सर्वान् कामान्त् संपूरयति ।

योऽग्निं नाचिकेतं चिनुते । 61 (10)

T.B.3.11.10.4

य उ चैन-मेवं वेद ॥ सम्वत्सरो वा अग्निर्नाचिकेतः ।

तस्य वसन्तः शिरः । ग्रीष्मो दक्षिणः पक्षः ।

वर्षाः पुच्छं ॥ शरदुत्तरः पक्षः । हेमन्तो मद्ध्यं ॥

पूर्वपक्षाश्रितयः । अपरपक्षाः पुरीषं । अहोरात्राणीष्टकाः () ।

एष वाव सौग्नि-रग्निमयः पुनर्णवः ।

अग्निमयो ह वै पुनर्णवो भूत्वा । स्वर्गं लोक-मेति ।

तैत्तिरीय ब्राह्मणम् – (TB 3.11)

आ॒दि॒त्यस्य॒ सायु॑ज्यं । यो॑ऽग्निं॒ नाचि॑के॒तं चि॑नु॒ते ।

य उ॑ चैन॒-मे॒वं वे॑द ॥ 62 (16) (अ॒मुं तया॑ लो॒कम॒भिज॑यति – शि॒र –
श्चि॒नु॒त – इ॒ष्टकाः॑ षट्च॑) (A10)

Prapaataka Korvai with starting Padams of 1 to 10 Anuvaakams :-

(लो॒क – स्त्व॑म॒ग्ने – ऽग्ना॑विष्णू – अ॒न्नप॑ते – स॒प्त ते॑ अ॒ग्ने –
य॒त्ते ऽचि॑त॒म – यं वा॑ – वो॒शन् ह॒ वै – त॒ ह॒तं – यां
प्र॒थ॒मा॒मि॒ष्टकां॑ द॒श)

Korvai with starting Padams of 1, 11, 21 Series of Dasinis :-

(लो॒क – आ॒दि॒त्य – ओजो॑ – ऽस्यूर्ध॑वा दि॒ग – न॒न्त॒ ह॒ वै –
का॒मे॒न – ग्री॒ष्मो॑ द्वि॒षष्टिः॑)

First and Last Padam 2nd Prapaatakam of Kaatakam:-

(लो॒को – वे॑द)

॥ हरिः॑ ओं ॥

॥ तैत्तिरीय यजुर्ब्राह्मणे काठके द्वितीयः प्रश्नः समाप्तः ॥

=====

काठके द्वितीयः प्रश्नः – (TB 3.11)

3.11 For Kaatakam - 2 (TB 3.11)

	Dasini	Vaakyams
Anuvakam 1	21	172
Anuvakam 2	4	44
Anuvakam 3	1	13
Anuvakam 4	2	39
Anuvakam 5	4	20
Anuvakam 6	4	40
Anuvakam 7	5	48
Anuvakam 8	8	81
Anuvakam 9	9	90
Anuvakam 10	4	46
Total →	62	593

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

3. कृष्ण यजुर्वेदीय तैत्तिरीय ब्राह्मणे तृतीयाष्टकं

3.12 तैत्तिरीय यजुर्ब्राह्मणे काठके तृतीयः प्रश्नः

चातुर्होत्रचयनं वैश्वसृजचयनं च

3.12.1 अनुवाकं 1 –वैश्वसृजचयनाङ्गभूताः दिवश्येनय इष्टयः

T.B.3.12.1.1

“तुभ्यन्ता अङ्गिरस्तमा{21}” “श्याम तङ्काममग्ने {22}” ।

“आशानां त्वा{23}” “विश्वा आशाः{24}” ।

“अनु नोऽद्यानुमति{25}” “रन्विदनुमते त्वं {26}” ।

“कामो भूतस्य{27}” “कामस्तदग्रे{28}” ।

“ब्रह्म जज्ञानं {29}” “पिता विराजां {30}” ।

“यज्ञो रायो {31}” “ऽयं यज्ञः {32}” । “आपो भद्रा {33}”

“आदित्यश्यामि {34}” । “तुभ्यं भरन्ति {35}” “यो देह्यः {36}” ।

“पूर्वं देवा अपरेण {37}” “प्राणापानौ {38}” ।

“हव्यवाह॑ {39}” “स्विष्टं {40}” ॥ 1 (10) तुभ्यं दश॑ (A1)

3.12.2 अनुवाकं 2 –तासां ब्राह्मणम्

T.B.3.12.2.1

दे॒वेभ्यो॑ वै स्व॒र्गो लो॒कस्ति॑रोऽभवत् । ते प्र॒जाप॑ति-मब्रुवन् ।
प्रजा॑पते स्व॒र्गो वै नो॑ लो॒कस्ति॑रोऽभूत् । तमन्वि॑च्छेति ।
तं य॑ज्ञक्र॒तुभि-रन्वै॑च्छत् । तं य॑ज्ञक्र॒तुभि-रान्वि॑न्दत् ।
तमिष्टि॑भि-रन्वै॑च्छत् । तमिष्टि॑भि-रान्वि॑न्दत् ।
तदिष्टी॑ना-मिष्टि॒त्वं । ए॒ष्टयो॑ ह॒वै नाम॑ ।
ता इष्ट॑य इत्याचक्षते प॒रोक्षे॑ण । प॒रोक्ष॑ प्रि॒या इव॑ हि दे॒वाः ॥ 2 (12)

T.B.3.12.2.2

तमाशा॑-ऽब्रवीत् । प्रजा॑पत आ॒शया॑ वै श्रा॒म्यसि॑ ।
अ॒हमु॒ वा आ॒शाऽस्मि॑ । मां नु॑ यजस्व ।
अथ॑ ते स॒त्याऽऽशा॑ भविष्यति । अनु॑ स्व॒र्गं लो॒कं वे॒त्स्यसी॑ति ।
स ए॒तम॑ग्नये॒ कामा॑य पुरो॒डाश॑-म॒ष्टाक॑पालं॒ निर॑वपत् ।
आ॒शायै॑ च॒रुं । अनु॑मत्यै च॒रुं । ततो॑ वै तस्य॑ स॒त्या-ऽऽशा॑ ऽभवत् ।
अनु॑ स्व॒र्गं लो॒क-म॑विन्दत् । स॒त्या ह॒ वा अ॒स्याशा॑ भवति ।
अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यजते ।

य उ चैनदेवं वेद ॥ सोऽत्र जुहोति ।
 अग्नये कामाय स्वाहा-ऽऽशायै स्वाहा ॥
 अनुमत्यै स्वाहा प्रजापतये स्वाहा ॥
 स्वर्गाय लोकाय स्वाहाऽग्नये स्विष्टकृते स्वाहेति ॥ 3 (19)

T.B.3.12.2.3

तं कामोऽब्रवीत् । प्रजापते कामेन वै श्राम्यसि ।
 अहमुवै कामोऽस्मि । मां नु यजस्व ।
 अथ ते सत्यः कामो भविष्यति । अनु स्वर्गं लोकं वेत्स्यसीति ।
 स एतमग्नये कामाय पुरोडाश-मष्टकपालं निरवपत् । कामाय चरुं ।
 अनुमत्यै चरुं । ततो वै तस्य सत्यः कामोऽभवत् ।
 अनु स्वर्गं लोकमविन्दत् । सत्यो ह वा अस्य कामो भवति ।
 अनु स्वर्गं लोकं विन्दति । य एतेन हविषा यजते ।
 य उ चैनदेवं वेद ॥ सोऽत्र जुहोति ।
 अग्नये कामाय स्वाहा कामाय स्वाहा ॥
 अनुमत्यै स्वाहा प्रजापतये स्वाहा ॥
 स्वर्गाय लोकाय स्वाहाऽग्नये स्विष्टकृते स्वाहेति ॥ 4 (19)

T.B.3.12.2.4

तं ब्र॒ह्माऽब्र॑वीत् । प्र॒जाप॑ते ब्र॒ह्म॒णा वै॑ श्राम्य॒सि । अ॒हमु॒ वै ब्र॒ह्माऽस्मि॑ ।
मां नु॑ यज॒स्व । अथ॑ ते ब्र॒ह्म॒ण्वान् य॒ज्ञो भ॑विष्यति ।
अनु॑ स्व॒र्गं लो॒कं वे॑त्स्यसीति ।
स ए॒तम॒ग्नये॒ कामा॑य पु॒रोडा॑श-म॒ष्टाक॑पालं नि॒रव॑पत् ।
ब्र॒ह्म॒णे च॒रुं । अनु॑मत्यै च॒रुं । ततो॒ वै तस्य॑ ब्र॒ह्म॒ण्वान् य॒ज्ञोऽभ॑वत् ।
अनु॑ स्व॒र्गं लो॒कम॑विन्दत् । ब्र॒ह्म॒ण्वान् ह॒ वा अ॒स्य य॒ज्ञो भ॑वति ।
अनु॑ स्व॒र्गं लो॒कं वि॑न्दति । य ए॒तेन॑ ह॒विषा॒ यज॑ते ।
य उ॒चैन॑दे॒वं वे॑द । सोऽन्न॑ जुहोति ।
अ॒ग्नये॒ कामा॑य स्वाहा ब्र॒ह्म॒णे स्वाहा॑ ।
अनु॑मत्यै स्वाहा प्र॒जाप॑तये स्वाहा ।
स्व॒र्गाय॑ लो॒काय॒ स्वाहा॒ ऽग्नये॑ स्वि॒ष्टकृ॑ते स्वाहेति ॥ 5 (19)

T.B.3.12.2.5

तं य॒ज्ञोऽब्र॑वीत् । प्र॒जाप॑ते य॒ज्ञेन॒ वै श्राम्य॑सि । अ॒हमु॒ वै य॒ज्ञोऽस्मि॑ ।
मां नु॑ यज॒स्व । अथ॑ ते स॒त्यो य॒ज्ञो भ॑विष्यति ।
अनु॑ स्व॒र्गं लो॒कं वे॑त्स्यसीति ।

स ए॒तम॒ग्नये॒ कामा॑य पु॒रोडा॑श-म॒ष्टाक॑पालं॒ निर॑वपत् ।
य॒ज्ञाय॑ च॒रुं । अनु॑म॒त्यै च॒रुं । ततो॑ वै तस्य॒ सत्यो॑ य॒ज्ञोऽभ॑वत् ।
अनु॑ स्व॒र्गं लो॒कम॑विन्दत् । स॒त्यो ह॒ वा अ॑स्य य॒ज्ञो भ॑वति ।
अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॒ते ।
य उ॒चैन॑दे॒वं वे॑द । सोऽ॒न्न जु॑होति ।
अ॒ग्नये॑ का॒माय॑ स्वा॒हा य॒ज्ञाय॑ स्वा॒हा ॥
अनु॑म॒त्यै स्वा॒हा प्र॒जाप॑तये स्वा॒हा ॥

स्व॒र्गाय॑ लो॒काय॑ स्वा॒हाऽग्नये॑ स्वि॒ष्टकृ॑ते स्वा॒हेति॑ ॥ 6 (19)

T.B.3.12.2.6

तमा॒पो-ऽब्रु॑वन् । प्र॒जाप॑तेऽप्सु वै स॒र्वे का॒माः श्रि॒ताः ।
व॒यमु॒ वा आ॑प॒स्मः । अ॒स्मान्नु॑ यज॒स्व ।
अथ॑ त्वयि॒ स॒र्वे का॒माः श्रि॑यिष्यन्ते । अनु॑ स्व॒र्गं लो॒कं वे॑त्स्यसीति ।
स ए॒तम॒ग्नये॒ कामा॑य पु॒रोडा॑श-म॒ष्टाक॑पालं॒ निर॑वपत् । अ॒द्भ्यश्च॒रुं ।
अनु॑म॒त्यै च॒रुं । ततो॑ वै तस्मि॒न्-स॒र्वे का॒मा अ॑श्रयन्त ।
अनु॑ स्व॒र्गं लो॒कम॑विन्दत् । स॒र्वे ह॒ वा अ॑स्मिन् का॒माः श्रि॑यन्ते ।
अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॒ते ।

य उ॒चैन॑दे॒वं वे॒द । सोऽ॒त्र जु॑होति ।

अ॒ग्नये॑ का॒माय॑ स्वा॒हा ऽद्भ्यः॑ स्वा॒हा ॥

अ॒नु॒म॒त्यै स्वा॒हा प्र॒जाप॑तये स्वा॒हा ॥

स्व॒र्गाय॑ लो॒काय॑ स्वा॒हाऽग्नये॑ स्वि॒ष्टकृ॑ते स्वा॒हेति॑ ॥ 7 (19)

T.B.3.12.2.7

तम॒ग्निर्ब॑लि॒मानब्र॑वीत् ।

प्र॒जाप॑ते ऽग्नये॑ वै ब॒लि॒मते॑ सर्वा॒णि भू॒तानि॑ ब॒लिꣳ हर॑न्ति ।

अ॒हमु॒ वा अ॒ग्निर्ब॑लि॒मानस्मि॑ । मां नु॑ यजस्व ।

अथ॑ ते सर्वा॒णि भू॒तानि॑ ब॒लिꣳ हरि॑ष्यन्ति ।

अ॒नु स्व॒र्गं लो॒कं वे॒थ्स्य॑सीति ।

स ए॒तम॒ग्नये॑ का॒माय॑ पु॒रोडा॑श-म॒ष्टाक॑पाल-न्नि॒रव॑पत् ।

अ॒ग्नये॑ ब॒लि॒मते॑ च॒रुं । अ॒नु॒म॒त्यै च॒रुं ।

ततो॑ वै तस्मै॑ सर्वा॒णि भू॒तानि॑ ब॒लि-म॑हरन् ।

अ॒नु स्व॒र्गं लो॒कम॑विन्दत् ।

सर्वा॒णि ह॒ वा अ॒स्मै भू॒तानि॑ ब॒लिꣳ हर॑न्ति ।

अनु॑ स्व॒र्गं लो॒कं वि॒न्दति॑ । य ए॒तेन॑ ह॒विषा॑ यज॒ते ।
य उ॒चैन॑दे॒वं वे॒द । सोऽ॒त्र जु॑होति ।
अ॒ग्नये॑ का॒माय॑ स्वा॒हा अ॒ग्नये॑ ब॒लिम॑ते स्वा॒हा ॥
अनु॑म॒त्यै स्वा॒हा प्र॒जाप॑तये स्वा॒हा ॥
स्व॒र्गाय॑ लो॒काय॑ स्वा॒हा अ॒ग्नये॑ स्वि॒ष्टकृ॑ते स्वा॒हेति॑ ॥ 8 (19)

T.B.3.12.2.8

तम॑नु॒वित्ति॑र-ब्रवीत् । प्र॒जाप॑ते स्व॒र्गं वै लो॒कम॑नु-वि॒विथ्स॑सि ।
अ॒हमु॒ वा अनु॑वित्तिरस्मि । मां नु यज॑स्व ।
अथ॑ ते स॒त्या ऽनु॑वित्ति-र्भवि॑ष्यति । अनु॑ स्व॒र्गं लो॒कं वे॒त्स्य॑सीति ।
स ए॒तम॑ग्नये॒ कामा॑य पु॒रोडा॑श-म॒ष्टक॑पालं नि॒रव॑पत् । अनु॑वित्त्यै च॒रुं ।
अनु॑म॒त्यै च॒रुं । ततो॑ वै तस्य॑ स॒त्या ऽनु॑वित्तिरभवत् ।
अनु॑ स्व॒र्गं लो॒क-म॑विन्दत् । स॒त्या ह॒ वा अ॒स्यानु॑वित्ति-र्भवति ।
अनु॑ स्व॒र्गं लो॒कं वि॒न्दति॑ । य ए॒तेन॑ ह॒विषा॑ यज॒ते ।
य उ॒चैन॑दे॒वं वे॒द । सोऽ॒त्र जु॑होति ।
अ॒ग्नये॑ का॒माय॑ स्वा॒हा-ऽनु॑वित्त्यै स्वा॒हा ॥
अनु॑म॒त्यै स्वा॒हा प्र॒जाप॑तये स्वा॒हा ॥

स्वर्गाय॑ लो॒काय॑ स्वाहा॒ऽग्नये॑ स्विष्ट॒कृते॑ स्वाहेति॑ ॥ 9 (19)

T.B.3.12.2.9

ता वा ए॒ताः सप्त॑ स्वर्गस्य॑ लो॒कस्य॑ द्वा॒रः ।
दि॒वः श्ये॑नयो॒ ऽनु॑वित्तयो॒ नाम॑ । आ॒शा प्र॑थमा॒ रक्ष॑ति ।
का॒मो द्वि॑तीयां । ब्र॒ह्म तृ॑तीयां । य॒ज्ञश्च॑तु॒र्थी । आ॒पः पञ्च॑मीं ।
अ॒ग्निर्ब॑लि॒मान्-थ॑ष्ठीं । अ॒नु॒वि॒त्तिः सप्त॑मीं ।
अ॒नु ह॑ वै स्वर्गं॑ लो॒कं वि॑न्दति ।
का॒मचा॑रो॒ऽस्य॑ स्वर्गे॑ लो॒के भ॑वति । य ए॒ताभि॑-रि॒ष्टिभि॑-र्य॒जते॑ ।
य उ॒चैना॑ ए॒वं वे॑द । तास्व॒न्वि॒ष्टि । प॒ष्ठौही॒ वरां॑ दद्यात् क॒ञ्च॑ ।
स्त्रि॒यै चा॑भा॒रञ्च॑ समृद्ध्यै ॥ 10 (16)

(No Korvai for Anuvaakam 2)

3.12.3 अनुवाकं 3 –उपाघा नामेष्टयः

T.B.3.12.3.1

तप॑सा दे॒वा दे॒वता॑-म॒ग्रे आ॑यन् । तप॑सर्ष॒यः स्वर॑न्वविन्दन् ।
तप॑सा स॒पत्नान्॑ प्रणु॒दामा॑रातीः । येने॒दं वि॑श्वं परि॒भूतं॑ यदस्ति॑ ॥
प्र॒थम॑जं दे॒वञ्च॑ ह॒विषा॑ वि॒धेम॑ । स्व॒यंभु॑ ब्र॒ह्म पर॑मं तपो॒ यत् ।
स ए॒व पु॒त्रः स पि॒ता स मा॒ता । तपो॑ ह य॒क्षं प्र॑थमञ्च॑ सं॒बभू॑व ॥

श्रद्धया दे॒वो दे॒वत्व॑-म॒श्नु॒ते । श्रद्धा॑ प्र॒तिष्ठा॑ लो॒कस्य॑ दे॒वी । 11 (10)

T.B.3.12.3.2

सा नो॑ जुषा॒णोप॑ य॒ज्ञ-मा॒गात् ॥ का॒मव॑त्स॒ऽमृतं॑ दु॒हाना॑ ॥
श्रद्धा॑ दे॒वी प्र॒थम॑जा ऋ॒तस्य॑ । वि॒श्वस्य॑ भ॒र्त्री ज॒गतः॑ प्र॒तिष्ठा॑ ।
ता॒ऽश्रद्धा॑ ह॒विषा॑ य॒जामहे॑ । सा नो॑ लो॒क-म॒मृतं॑ दधातु ।
ईशा॑ना दे॒वी भुव॑न॒स्याधि॑प॒त्नी ॥ आ॒गा॒त्स॒त्य ह॒विरि॒दं जुषा॑णं ।
यस्मा॑द्दे॒वा ज॒ज्ञिरे॑ भुव॑नञ्च वि॒श्वे ॥
तस्मै॑ वि॒धेम॑ ह॒विषा॑ घृ॒तेन॑ । 12 (10)

T.B.3.12.3.3

यथा॑ दे॒वैः स॒धमा॑दं म॒देम॑ ॥ यस्य॑ प्र॒तिष्ठो॑-र्व॒न्तरि॑क्षं ।
यस्मा॑द्दे॒वा ज॒ज्ञिरे॑ भुव॑नञ्च स॒र्वे ॥
तत्स॒त्य-म॑र्चदुप॒यज्ञं॑ न आ॒गात् । ब्र॒ह्माहु॑ती-रु॒पमो॑द॒मानं॑ ॥
मन॑सो व॒शे स॑र्वमि॒दं ब॒भूव॑ ।
नान्य॑स्य॒ मनो॑ व॒शम॑न्वि॒याय॑ ।
भी॒ष्मो हि॑ दे॒वः स॒हसः॑ स॒हीयान्॑ ।
स नो॑ जुषा॒ण उप॑ य॒ज्ञमा॒गात् ॥

आकू॑तीना-मधि॑पतिं॒ चेत॑सां च । 13 (10)

T.B.3.12.3.4

सङ्क॑ल्पजूतिं॒ देवं॑ वि॒पश्चिं॑ । मनो॑ राजा॒नमि॑ह वर्द्धय॑न्तः ।
उप॒हवै॑ ऽस्य सु॒मतौ॑ स्याम ॥ चरणं॑ पवि॒त्रं वि॑त॒तं पु॒राणं॑ ।
येन॑ पू॒तस्तर॑ति दुष्कृ॒तानि॑ । तेन॑ पवि॒त्रेण॑ शु॒द्धेन॑ पू॒ताः ।
अति॑ पा॒प्मान॑-मरा॒तिं तरे॑म ॥ लो॒कस्य॑ द्वा॒र-मर्चि॑मत् पवि॒त्रं ॥
ज्योति॑ष्मद् भ्राज॒मानं॑ मह॒स्वत् । अ॒मृत॑स्य धा॒रा बहु॑धा दोह॒मानं॑ () ।
चरणं॑ नो लो॒के सु॒धितां॑ दधातु ॥ “अ॒ग्नि मूर्द्धा{41}” “भुवः{42}” ॥
“अनु॑ नो ऽद्यानु॑मति{43}” “रन्वि॑दनु॒मते॒त्वं{44}” ॥

“हव्य॑वाह॒ः{45}” “स्वि॑ष्टं{46}” ॥ 14 (14)

(दे॒वी - घृ॒तेन॑ - चे॒तसां॑ च - दोह॑मानं च॒त्वारि॑ च) (A3)

3.12.4 अनुवाकं 4 -तासां ब्राह्मणम्

T.B.3.12.4.1

दे॒वेभ्यो॑ वै स्व॒र्गो लो॒कस्ति॑रो ऽभवत् । ते प्र॒जाप॑ति-मब्रुवन् ।
प्र॒जाप॑ते स्व॒र्गो वै नो॑ लो॒कस्ति॑रोऽभूत् । तमन्वि॑च्छेति ।
तं य॑ज्ञक्र॒तुभि॑-रन्वै॑च्छत् । तं य॑ज्ञक्र॒तुभि॑ नान्वि॑न्दत् ।

तमिष्टिभि॑-रन्वै॑च्छत् । तमिष्टिभि॑-रन्वविन्दत् । तदिष्टी॑ना-मिष्टि॑त्वं ।
ए॒ष्टयो॑ ह॒ वै नाम॑ । ता इ॒ष्टय॑ इत्या चक्षते परोक्षे॑ण ।

परोक्ष॑प्रिया इव हि दे॒वाः ॥ 15 (12)

T.B.3.12.4.2

तं तपो॑ऽ ब्रवीत् । प्रजा॑पते तप॑सा वै श्राम्य॑सि ।
अ॒हमु॑ वै तपो॑ऽ स्मि । मां नु यज॑स्व ।
अथ॑ ते सत्यं तपो॑ भविष्यति । अनु॑ स्वर्गं लो॒कं वे॒थ्स्यसी॑ति ।
स ए॒तमा॑ग्नेय-म॒ष्टाक॑पालं निरवपत् । तप॑से चरुं ।
अनु॑मत्यै चरुं । ततो॑ वै तस्य सत्यं तपो॑ ऽभवत् ।
अनु॑ स्वर्गं लो॒कम॑विन्दत् । सत्य॑ ऽ ह॒ वा अ॑स्य तपो॑ भवति ।
अनु॑ स्वर्गं लो॒कं वि॑न्दति । य ए॒तेन॑ ह॒विषा॑ यजते ।
य उ॑ चैनदे॒वं वे॑द । सोऽत्र॑ जुहोति । अ॒ग्नये॑ स्वाहा॒ तप॑से स्वाहा॑ ।
अनु॑मत्यै स्वाहा॑ प्रजा॑पतये स्वाहा॑ ।
स्वर्गा॑य लो॒काय॑ स्वाहा॒ऽग्नये॑ स्विष्ट॒कृते॑ स्वाहेति॑ ॥ 16 (19)

T.B.3.12.4.3

त७ श्रद्धा-ऽब्रवीत् । प्रजापते श्रद्धया वै श्राम्यसि ।
अहमु वै श्रद्धाऽस्मि । मां नु यजस्व ।
अथ ते सत्या श्रद्धा भविष्यति । अनु स्वर्गं लोकं वेत्स्यसीति ।
स एतमाग्नेय-मष्टाकपालं निरवपत् । श्रद्धायै चरुं ।
अनुमत्यै चरुं । ततो वै तस्य सत्या श्रद्धाऽभवत् ।
अनु स्वर्गं लोकमविन्दत् । सत्या ह वा अस्य श्रद्धा भवति ।
अनु स्वर्गं लोकं विन्दति । य एतेन हविषा यजते ।
य उ चैनदेवं वेद । सोऽत्र जुहोति । अग्नये स्वाहा श्रद्धायै स्वाहा ॥
अनुमत्यै स्वाहा प्रजापतये स्वाहा ॥
स्वर्गाय लोकाय स्वाहाऽग्नये स्विष्टकृते स्वाहेति ॥ 17 (19)

T.B.3.12.4.4

त७ सत्य-मब्रवीत् । प्रजापते सत्येन वै श्राम्यसि ।
अहमु वै सत्यमस्मि । मां नु यजस्व ।
अथ ते सत्यं सत्यं भविष्यति । अनु स्वर्गं लोकं वेत्स्यसीति ।
स एतमाग्नेय-मष्टाकपालं निरवपत् । सत्याय चरुं ।

अनु॑म॒त्यै च॒रुं । ततो॑ वै तस्य॑ स॒त्यꣳ स॒त्यम॑भवत् ।
 अनु॑ स्व॒र्गं लो॒कम॑विन्दत् । स॒त्यꣳ ह वा अ॑स्य स॒त्यं भ॑वति ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॑ते ।
 य उ॒चैन॑दे॒वं वे॑द । सोऽ॒त्र जु॑होति । अ॒ग्नये॑ स्वाहा स॒त्याय॑ स्वाहा ॥
 अनु॑म॒त्यै स्वाहा॑ प्र॒जाप॑तये स्वाहा ॥
 स्व॒र्गाय॑ लो॒काय॑ स्वाहाऽ॒ग्नये॑ स्वि॒ष्टकृ॑ते स्वाहेति ॥ 18 (19)

T.B.3.12.4.5

तं मनो॑ऽब्रवीत् । प्र॒जाप॑ते मन॒सा वै श्राम्य॑सि ।
 अ॒हमु॑ वै मनो॑ऽस्मि । मां नु॑ यज॒स्व ।
 अथ॑ ते स॒त्यं मनो॑ भविष्यति । अनु॑ स्व॒र्गं लो॒कं वे॑त्स्यसीति ।
 स ए॒तमा॑ऽग्नेय॒-म॒ष्टाक॑पालं॒ निर॑वपत् । मन॒से च॒रुं ।
 अनु॑म॒त्यै च॒रुं । ततो॑ वै तस्य॑ स॒त्यं मनो॑ऽभवत् ।
 अनु॑ स्व॒र्गं लो॒कम॑विन्दत् । स॒त्यꣳ ह वा अ॑स्य मनो॑ भवति ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॑ते ।
 य उ॒चैन॑ दे॒वं वे॑द । सोऽ॒त्र जु॑होति ।
 अ॒ग्नये॑ स्वाहा मन॒से स्वाहा॑ ॥

अ॒नु॒म॒त्यै॑ स्वा॒हा प्र॒जा॒प॒तये॑ स्वा॒हा ।

स्व॒र्गाय॑ लो॒काय॑ स्वा॒हा॒ऽअ॒ग्नये॑ स्वि॒ष्ट॒कृ॒ते स्वा॒हेति॑ ॥ 19 (19)

T.B.3.12.4.6

तं च॒रण॒-म॒ब्रवी॑त् । प्र॒जा॒प॒ते च॒रणे॑न वै श्रा॒म्यसि॑ ।

अ॒ह॒मु॒ वै च॒रण॒म॒स्मि । मां नु॑ य॒जस्व॑ ।

अथ॑ ते स॒त्यं च॒रणं॑ भ॒विष्य॑ति । अ॒नु स्व॒र्गं लो॒कं वे॒थ्स्य॑सीति ।

स ए॒तमा॑ऽअ॒ग्नये॑-म॒ष्टाक॑पा॒लं नि॒रव॑पत् । च॒र॒णाय॑ च॒रुं ।

अ॒नु॒म॒त्यै च॒रुं । ततो॑ वै तस्य॑ स॒त्यं च॒रण॒म॒भव॑त् ।

अ॒नु स्व॒र्गं लो॒कम॑वि॒न्दत् । स॒त्यं ह॒ वा अ॒स्य च॒रणं॑ भ॒वति॑ ।

अ॒नु॒स्व॒र्गं लो॒कं वि॒न्दति॑ । य ए॒तेन॑ ह॒विषा॑ य॒जते॑ ।

य उ॒चैन॑दे॒वं वे॒द । सोऽत्र॑ जुहोति ।

अ॒ग्नये॑ स्वा॒हा च॒र॒णाय॑ स्वा॒हा । अ॒नु॒म॒त्यै स्वा॒हा प्र॒जा॒प॒तये॑ स्वा॒हा ।

स्व॒र्गाय॑ लो॒काय॑ स्वा॒हा॒ऽअ॒ग्नये॑ स्वि॒ष्ट॒कृ॒ते स्वा॒हेति॑ ॥ 20 (19)

T.B.3.12.4.7

ता वा ए॒ताः प॒ञ्च स्व॒र्गस्य॑ लो॒कस्य॑ द्वा॒रः ।

अ॒पा॒घा अ॒नु॒वि॒त्तयो॑ ना॒म । तपः॑ प्र॒थमा॑ र॒क्षति॑ ।

श्रद्धा द्वितीयां । सत्यं तृतीयां । मनश्चतुर्थीं । चरणं पञ्चमीं ।
अनु ह वै स्वर्गं लोकं विन्दति ।
कामचारोऽस्य स्वर्गे लोके भवति । य एताभि-रिष्टिभि-र्यजते ।
य उचैना एवं वेद ।
तास्वन्विष्टि । पष्ठौही वरां दद्यात् कऽसञ्च ।
स्त्रियै चाभारऽसमृद्ध्यै ॥ 21 (14)

(No Korvai for Anuvaakam 4)

3.12.5 अनुवाकं 5 –चातुर्होत्रचयनम्

T.B.3.12.5.1

ब्रह्म वै चतुर्.होतारः । चतुर्.होतृभ्योऽधि यज्ञो निर्मितः ।
नैनऽशप्तं । नाभिचरित-मागच्छति । य एवं वेद ॥
यो ह वै चतुर्.होतृणां चतुर्.होतृत्वं वेद ।
अथो पञ्च होतृत्वं । सर्वा हास्मै दिशः कल्पन्ते ।
वाचस्पतिर्. होता दशहोतृणां । पृथिवी होता चतुर्.होतृणां । 22 (10)

T.B.3.12.5.2

अग्निर्. होता पञ्चहोतृणां । वाग्धोता षड्होतृणां ।
महाहविर्. होता सप्तहोतृणां । एतद्वै चतुर्.होतृणां चतुर्.होतृत्वं ।

अथो॑ पञ्च॑होतृ॒त्वं । सर्वा॑ हा॒स्मै दि॒शः कल्प॑न्ते । य ए॒वं वै॒दे ॥

ए॒षा वै सर्व॑ वि॒द्या । ए॒तद् भैष॑जं ।

ए॒षा प॒ङ्क्तिः स्वर्ग॑स्य लो॒कस्यां॑ ज॒साय॑निः स्रु॒तिः । 23 (10)

T.B.3.12.5.3

ए॒तान् योऽ॒र्ध्यै-त्य॑छदि॒र्द्शो याव॑त्त॒रसं॑ । स्व॑रेति ।

अ॒न॒प॒ब्र॒वः सर्व॑मायु॒रेति॑ । वि॒न्दते॑ प्र॒जां । रा॒य॒स्पोषं॑ गौप॒त्यं ।

ब्र॒ह्म॒व॒र्च॒सी भ॑वति ॥ ए॒तान् योऽ॒र्ध्यैति॑ । स्पृ॒णो॒त्यात्मा॑नं॑ ।

प्र॒जां पि॒तृन् ॥ ए॒तान् वा अ॑रु॒ण औप॑वेशि वि॒दाञ्च॑कार । 24 (10)

T.B.3.12.5.4

ए॒तैर॑धि॒वा॒दम॑पाजयत् । अथो॑ वि॒श्वं पा॒प्मानं॑ ।

स्व॑र्ययौ । ए॒तान् योऽ॒र्ध्यैति॑ । अ॒धि॒वा॒दं ज॑यति ।

अथो॑ वि॒श्वं पा॒प्मानं॑ । स्व॑रेति ॥

ए॒तैर॑ग्निं चि॒न्वीत॑ स्व॒र्गका॑मः ।

ए॒तैरा॑युष्कामः । प्र॒जा प॒शुकामो॑ वा ॥ 25 (10)

T.B.3.12.5.5

पु॒रस्ता॑-द॒शहो॑तार-मु॒दञ्च॑-मु॒प॒दधा॑ति यावत्प॒दं ।

हृ॒दयं॑ य॒जुषी॑ प॒त्न्यौ च॑ । द॒क्षि॒णतः॑ प्राञ्चं॑ चतु॒र्हो॑तारं ।

प॒श्चादु॑द॒ञ्चं प॒ञ्च हो॑तारं । उ॒त्तर॑तः प्रा॒ञ्च ष॑ड्ढो॒तारं ।
 उ॒परि॑ष्ठात् प्रा॒ञ्च स॒प्तहो॑तारं । हृ॒दयं॑ य॒जूषि॑ प॒त्न्यश्च॑ ।
 य॒थाव॑का॒शं ग॒हान् । य॒थाव॑का॒शं प्र॑तिग॒हान् लो॑कं पृ॒णाश्च॑ ।
 सर्वा॑ हा॒स्यैता॑ दे॒वताः॑ प्री॒ता अ॒भीष्टा॑ भवन्ति । 26 (10)

T.B.3.12.5.6

स॒दे॒वम॒ग्निं चि॑नुते ॥ रथ॑सं॒मित-श्चे॒तव्यः॑ । व॒ज्रो वै रथः॑ ।
 व॒ज्रेणै॑व पा॒प्मानं॑ भ्रातृ॒व्यं स्तृ॑णुते । प॒क्षः सं॒मित-श्चे॒तव्यः॑ ।
 ए॒तावा॑न् वै रथः । याव॑त्प॒क्षः । रथ॑सं॒मितमे॒व चि॑नुते ॥
 इ॒ममे॒व लो॒कं प॑शु॒बन्धे॒नाभि॑जयति । अथो॑ अ॒ग्निष्टो॒मेन॑ । 27 (10)

T.B.3.12.5.7

अ॒न्तरि॑क्ष-मु॒क्थ्ये॑न । स्वर॑तिरा॒त्रेण॑ । सर्वा॑न् लो॒कान॑ही॒नेन॑ ।
 अथो॑ स॒त्रेण॑ ॥ व॒रो द॑क्षिणा । व॒रेणै॑व वरं॑ स्पृ॒णोति॑ ।
 आ॒त्मा हि वरः॑ ॥ ए॒कवि॑ंशति॒र्दक्षि॑णा द॒दाति॑ ।
 ए॒कवि॑ंशो वा इ॒तः स्व॒र्गो लो॒कः । प्र॒स्वर्गं लो॒कमा॑प्नोति । 28 (10)

T.B.3.12.5.8

अ॒सावा॑दि॒त्य ए॒कवि॑ंशः । अ॒मुमे॒वा-दि॒त्यमा॑प्नोति ॥
 श॒तं द॑दाति । श॒तायुः॑ पु॒रुषः॑ श॒तेन्द्रि॑यः ।

आयु॑ष्ये॒वेन्द्रि॑ये प्र॒ति॒ति॒ष्ठति॑ ॥ स॒हस्रं॑ द॒दाति॑ ।
स॒हस्रं॑ सं॒मितः॑ स्व॒र्गो लो॒कः । स्व॒र्गस्य॑ लो॒कस्या॑-भि॒जित्यै॑ ॥
अ॒न्विष्ट॑कं दक्षि॒णा द॒दाति॑ । सर्वा॑णि वया॑ँसि । 29 (10)

T.B.3.12.5.9

सर्व॑स्याप्त्यै॑ । सर्व॑स्या-वरु॑द्ध्यै ॥ यदि॑ न वि॒न्देत॑ ।
म॒न्थाने॑ता॒वतो॑ दद्यादो॒दनान्॑ वा । अ॒श्नु॒ते तं का॒मं ।
यस्मै॑ का॒माया॑-ग्नि॒श्रीयते॑ ॥ प॒ष्ठौहीं॑ त्वन्तर्व॒तीं दद्यात्॑ ।
सा हि सर्वा॑णि वया॑ँसि । सर्व॑स्याप्त्यै॑ । सर्व॑स्या-वरु॑द्ध्यै ॥ 30 (10)

T.B.3.12.5.10

हि॒रण्यं द॒दाति॑ । हि॒रण्य-ज्यो॑तिरे॒व स्व॒र्गं लो॒कमे॑ति ॥
वा॒सो द॒दाति॑ । तेनायुः॑ प्र॒तिर॑ते ॥ वे॒दि॒तृती॑ये य॒जेत॑ ।
त्रि॒षत्या॑ हि दे॒वाः । स स॑त्यम॒ग्निं चि॑नुते ॥
तदे॒तत् प॑शुब॒न्धे ब्रा॑ह्मणं ब्रूयात् । ने॒तरे॑षु य॒ज्ञेषु॑ ॥
यो ह॒ वै च॑तुर्.होतृ-ननु॑स॒वनं॑ तर्पयि॒तव्यान्॑ वे॒द । 31 (10)

T.B.3.12.5.11

तृ॒प्यति॑ प्र॒जया॑ प॒शुभिः॑ । उपै॑नँ सोमपी॒थो न॑मति ।
ए॒ते वै च॑तुर्.हो॒तारो॑ ऽनु॒स॒वनं॑ तर्पयि॒तव्याः॑ । ये ब्रा॑ह्म॒णा बहु॑वि॒दः ।

तेभ्यो॑ यद्दक्षि॑णा न॒ नये॑त् । दु॒रि॑ष्टं॒ स्या॑त् । अ॒ग्नि॑म॒स्य वृ॑ज्जीरन् ।

तेभ्यो॑ यथा॒ श्रद्धं॑ द॒द्यात् । स्वि॑ष्टमे॒ वैतत्क्रि॑यते ।

नास्या॒ग्निं वृ॑ज्जते ॥ 32 (10)

T.B.3.12.5.12

हि॒र॒ण्ये॒ष्ट॒को भ॑वति । याव॑दु॒त्त॒म-म॑ङ्गुलि-काण्डं॑ य॒ज्ञ प॒रुषा॑ संमि॑तं ।

तेजो॑ हि॒र॒ण्यं ॥ यदि॑ हि॒र॒ण्यं न॒ वि॒न्दे॑त् । शर्क॑रा अ॒क्ता उप॑द॒ध्यात् ।

तेजो॑ घृ॒तं । स॒ते॒ज॒स॒मे-वा॒ग्निं चि॑नुते ॥

अ॒ग्नि॒ज्चित्वा॑ सौ॒त्रा॒म॒ण्या य॑जेत॒ मै॒त्रा॒व॒रु॒ण्या वा॑ ।

वी॒र्ये॑ण॒ वा ए॒ष व्यृ॑द्ध्यते ।

योऽ॒ग्नि॒ज्चि॑नुते () । 33 (10)

T.B.3.12.5.13

याव॑दे॒व वी॒र्यं॑ । तद॑स्मिन् द॒धाति॑ ॥

ब्र॒ह्म॒णः सा॒यु॒ज्यं स॒लो॒क॒ता-मा॒प्नो॑ति ।

ए॒ता॒सा॒मे॒व दे॒वता॑नां॒ सा॒यु॒ज्यं ।

सा॒र्षि॒ता स॒मा॒न लो॒क॒ता-मा॒प्नो॑ति । य ए॒त॒म॒ग्निं चि॑नुते ।

य उ॒चै॒नमे॒वं वे॑द ॥ ए॒त॒दे॒व सा॒वि॒त्रे ब्रा॒ह्म॒णं । अथो॑ नाचि॒के॒ते ॥ 34 (9)

(हो॒ता च॑तुर्॒होतृ॑णा॒ – सु॒ति – श्व॑कार – वा – भव॑न्त्य –
ग्नि॒ष्टोमे॑ना॒ – ज्ञो॒ति – वया॑सि॒ – वया॑सि॒ – सर्व॑स्याप्यै
सर्व॑स्याव॒रुद्ध्यै॑ – वेद॑ – वृ॒ज्जते॑ – चि॒नुते॑ – +नव॑ च) (A5)

3.12.6 अनुवाकं 6 –वैश्वसृजचयनम्

T.B.3.12.6.1

यच्चा॒मृतं॑ यच्च॑ म॒र्त्यं॑ । यच्च॑ प्रा॒णिति॑ यच्च॑ न ।
सर्वा॑स्ता इ॒ष्टकाः॑ कृ॒त्वा । उप॑ का॒मदु॑घा दधे ।
तेन॑र्षि॒णा तेन॑ ब्र॒ह्मणा॑ । तया॑ दे॒वतया॑ – ऽङ्गि॒रस्वद् – ध्रु॒वा सी॑द ॥
सर्वाः॑ स्त्रि॒यः सर्वा॑न् पु॒ंसः॑ । सर्वं॑ न स्त्री – पु॒मञ्च॑ यत् ।
सर्वा॑स्ताः ॥ याव॑न्तः पा॒ंसवो॑ भू॒मेः॑ । 35 (10)

T.B.3.12.6.2

सङ्ख्या॑ता दे॒वमा॒यया॑ । सर्वा॑स्ताः ॥ याव॑न्त ऊ॒षाः प॒शूनां॑ ।
पृथि॒व्यां पुष्टि॑ हि॒ताः । सर्वा॑स्ताः ॥ याव॑तीः सि॒कताः॑ सर्वाः॑ ।
अ॒प्स्वन्तश्च॑ याः श्रि॒ताः । सर्वा॑स्ताः ॥ याव॑तीः श॒र्करा॑ धृ॒त्यै॑ ।
अ॒स्यां पृथि॒व्यामधि॑ । 36 (10)

T.B.3.12.6.3

सर्वास्ताः ॥ यावन्तो-ऽश्मानोऽस्यां पृथिव्यां ।

प्रतिष्ठासु प्रतिष्ठिताः । सर्वास्ताः ॥ यावती वीरुधः सर्वाः ।

विष्ठिताः पृथिवीमनु । सर्वास्ताः ॥ यावतीरोषधीः सर्वाः ।

विष्ठिताः पृथिवीमनु । सर्वास्ताः ॥ 37 (10)

T.B.3.12.6.4

यावन्तो वनस्पतयः । अस्यां पृथिव्यामधि । सर्वास्ताः ॥

यावन्तो ग्राम्याः पशवः सर्वे । आरण्याश्च ये ।

सर्वास्ताः ॥ ये द्विपाद-श्चतुष्पादः । अपाद उदरसर्पिणः ।

सर्वास्ताः ॥ यावदाज्ज-नमुच्यते । 38 (10)

T.B.3.12.6.5

देवत्रा यच्च मानुषं । सर्वास्ताः ॥ यावत्कृष्णायसं सर्वं ।

देवत्रा यच्च मानुषं । सर्वास्ताः ॥ याव ल्लोहायसं सर्वं ।

देवत्रा यच्च मानुषं । सर्वास्ताः ॥ सर्वं सीसं सर्वं त्रपु ।

देवत्रा यच्च मानुषं । 39 (10)

T.B.3.12.6.6

सर्वा॒स्ताः ॥ सर्व॑ꣳ हिर॑ण्यꣳ रज॑तं । दे॒वत्रा॑ यच्च॑ मा॒नुषं॑ ।

सर्वा॒स्ताः ॥ सर्व॑ꣳ सुव॑र्णꣳ हरि॑तं । दे॒वत्रा॑ यच्च॑ मा॒नुषं॑ ।

सर्वा॒स्ता इ॒ष्टकाः॑ कृ॒त्वा । उप॑कामदु॒घा द॑धे ।

तेन॑र्षि॒णा तेन॑ ब्र॒ह्मणा॑ ।

तया॑ दे॒वतया॑-ऽङ्गिर॒स्वद्-ध्रु॒वा सीद॑ () ॥ 40 (10)

[भू॒मे - र॒धि - वि॒ष्टिताः॑ पृ॒थिवी॑म॒नु सर्वा॒स्ता -

उच्य॑ते - मा॒नुषꣳ - सीद॑ ()] (A6)

Special Korvai

(यच्च॑ स्त्रि॒यः पाꣳसव॑ ऊ॒षाः सि॒कताः॑ शर्क॑रा अ॒श्मानो॑ वी॒रुध॑
ओष॑धीर् वन॒स्पत॑यो ग्रा॒म्या ये द्वि॒पादो॑ याव॒दाञ्जनं॑ याव॒त् कृ॒ष्णाय॑सं
लो॒हाय॑सꣳ सी॒सꣳ हि॒रण्यꣳ सुव॑र्णꣳ हरि॑तम॒ष्टाद॑श)

3.12.7 अनुवाकं 7 -वैश्वसृजचयनम्

T.B.3.12.7.1

सर्वा॑ दि॒शो दि॒क्षु । यच्चा॒न्त भू॒तं प्र॑ति॒ष्ठितं॑ ।

सर्वा॒स्ता इ॒ष्टकाः॑ कृ॒त्वा । उप॑ कामदु॒घा द॑धे ।

तेन॑र्षि॒णा तेन॑ ब्र॒ह्मणा॑ । तया॑ दे॒वतया॑-ऽङ्गिर॒स्वद्-ध्रु॒वा सीद॑ ॥

अ॒न्तरि॑क्षञ्च॒ के॒वलं॑ । यच्चा॒स्मि-न्न॑न्तरा॒हितं॑ ।

स॒र्वा॒स्ताः॑ ॥ आ॒न्तरि॑क्ष्यश्च॒ याः प्र॒जाः । 41 (10)

T.B.3.12.7.2

गन्ध॑र्वा-फ॒सर॑सश्च॒ ये । स॒र्वा॒स्ताः॑ ॥ स॒र्वानु॑दा॒रान्-थ्स॑लिलान् ।

अ॒न्तरि॑क्षे प्र॒तिष्ठि॑तान् । स॒र्वा॒स्ताः॑ ॥ स॒र्वानु॑दा॒रान्-थ्स॑लिलान् ।

स्था॒वराः॑ प्रो॒ष्या॑श्च॒ ये । स॒र्वा॒स्ताः॑ ॥ स॒र्वा धु॒निꣳ स॒र्वान्-ध्वꣳसान् ।

हि॒मो यच्च॑ शी॒यते॑ ॥ 42 (10)

T.B.3.12.7.3

स॒र्वा॒स्ताः॑ ॥ स॒र्वान् म॑री॒चीन् वित॑तान् । नी॒हारो॑ यच्च॑ शी॒यते॑ ॥

स॒र्वा॒स्ताः॑ ॥ स॒र्वा वि॒द्युतः॑ स॒र्वान्थ् स्तन॑यि॒न्नून् ।

हा॒दुनी॑ र्यच्च॑ शी॒यते॑ ॥ स॒र्वा॒स्ताः॑ ॥ स॒र्वाः स्र॑वन्तीः स॒रितः॑ ।

स॒र्वम॑प्सु च॒रञ्च॑ यत् । स॒र्वा॒स्ताः॑ ॥ 43 (10)

T.B.3.12.7.4

याश्च॑ कू॒प्या याश्च॑ ना॒द्याः स॒मुद्रि॑याः । याश्च॑ वै॒शन्ती॑रुत प्रा॒सची॑र्याः ।

स॒र्वा॒स्ताः॑ ॥ ये चो॒त्तिष्ठ॑न्ति जी॒मूताः॑ । याश्च॑ वर्॒षन्ति॑ वृ॒ष्टयः॑ ।

स॒र्वा॒स्ताः॑ ॥ तप॑स्तेज॒ आका॑शं । यच्चा॒काशे॑ प्र॒तिष्ठि॑तं ।

स॒र्वा॒स्ताः॑ ॥ वा॒युं व॑याꣳसि स॒र्वाणि॑ । 44 (10)

T.B.3.12.7.5

अ॒न्तरि॒क्षच॒रञ्च॒ यत् । सर्वा॒स्ताः ॥ अ॒ग्नि॒ꣳ सूर्यं॑ च॒न्द्रं ।
मि॒त्रं व॑रु॒णं भ॒गं । सर्वा॒स्ताः ॥ स॒त्यꣳ श्र॒द्धां तपो॑ द॒मं ।
नाम॑ रू॒पञ्च॑ भू॒तानां॑ । सर्वा॒स्ता इ॒ष्टकाः॑ कृ॒त्वा ।
उप॑ का॒मदु॒घा द॑धे । तेन॑र्षि॒णा तेन॑ ब्र॒ह्मणा॑ () ।
तया॑ दे॒वतया॑-ऽङ्गि॒रस्वद्-ध्रु॒वा सीद॑ ॥ 45 (11)

(प्र॒जा-हि॒मो यच्च॑ शी॒यते॑-सर्वा॒स्ताः-सर्वा॑णि-ब्र॒ह्मणै॑कं च) (A7)

Special Korvai

(दि॒शोऽन्त॑रि॒क्षमा॒न्तरि॒क्ष्य उ॒दा॒रानु॑दा॒रान् धु॒निं म॑री॒चीन् वि॒द्युतः॑
स्र॒वन्ती॒र्याश्च॑ ये च तपो॑ वा॒युम॒ग्निꣳ स॒त्यं पञ्च॑द॒श)

3.12.8 अनुवाकं 8 -वैश्वसृजचयनम्

T.B.3.12.8.1

सर्वा॑ दि॒वꣳ सर्वा॑न् दे॒वान् दि॒वि । यच्चा॒न्त भू॒तं प्र॑ति॒ष्ठितं॑ ।
सर्वा॒स्ता इ॒ष्टकाः॑ कृ॒त्वा । उप॑ का॒मदु॒घा द॑धे । तेन॑र्षि॒णा तेन॑ ब्र॒ह्मणा॑ ।
तया॑ दे॒वतया॑-ऽङ्गि॒रस्वद्-ध्रु॒वा सीद॑ ॥ याव॑ती स्ता॒रकाः॑ सर्वाः॑ ।
वि॒तता॑ रो॒चने॑ दि॒वि । सर्वा॒स्ताः ॥ ऋ॒चो यजू॑ꣳषि सा॒मानि॑ । 46 (10)

T.B.3.12.8.2

अथ॒र्वाङ्गि॒रसश्च॒ ये । सर्वा॒स्ताः॑ ॥ इति॒हास॒पुरा॒णञ्च॑ ।
सर्प॒देव॒जनाश्च॒ ये । सर्वा॒स्ताः॑ ॥ ये च॑ लो॒का ये चा॒लोकाः॑ ।
अन्त॑ भू॒तं प्रति॑ष्ठितं । सर्वा॒स्ताः॑ ॥ यच्च॑ ब्र॒ह्म यच्चा॑ब्र॒ह्म ।
अन्त॑ ब्र॒ह्मन् प्रति॑ष्ठितं । 47 (10)

T.B.3.12.8.3

सर्वा॒स्ताः॑ ॥ अ॒हो॒रा॒त्राणि॑ सर्वा॒णि । अ॒र्द्ध॒मा॒साञ्च॑ के॒वलान्॑ ।
सर्वा॒स्ताः॑ ॥ सर्वा॑नृ॒तून्-थ्सर्वा॑न् मा॒सान् । स॒म्व॑त्स॒रञ्च॑ के॒वलं॑ ।
सर्वा॒स्ताः॑ ॥ सर्वं॑ भू॒तञ्च॑ सर्वं॑ भ॒व्यं॑ । यच्चा॑तोऽधि॑ भ॒विष्य॑ति ।
सर्वा॒स्ता इष्ट॑काः कृ॒त्वा () । उप॑ का॒मदु॒घा दधे॑ ।
तेन॑र्षि॒णा तेन॑ ब्र॒ह्मणा॑ ।
तया॑ दे॒वत॑या-ऽङ्गि॒रस्वद्-ध्रु॒वा सी॑द ॥ 48 (13)
(सा॒मानि॑ – ब्र॒ह्मन् प्रति॑ष्ठितं – कृ॒त्वा त्री॑णि च) (A8)

Special Korvai

(दि॒वं ता॒रका॑ ऋ॒च इति॒हास॒पुरा॒णं च॒ ये च॒ यच्चा॑हो॒रा॒त्राण्यृ॒तून्
भू॒तं नव॑)

3.12.9 अनुवाकं 9 – ब्रह्मा सदस्यासीनो वैश्वसृजान् व्याचष्टे

T.B.3.12.9.1

ऋचां प्राची महती दिगुच्यते । दक्षिणा-माहु र्यजुषामपारां ।
अथर्वणा-मण्डिरसां प्रतीची । साम्ना-मुदीची महती दिगुच्यते ॥
ऋग्भिः पूर्वाह्णे दिवि देव ईयते । यजुर्वेदे तिष्ठति मध्ये अहः ।
सामवेदे-नास्तमये महीयते । वेदै-रशून्य-स्त्रिभिरेति सूर्यः ॥
ऋग्भ्यो जाताः सर्वशो मूर्ति-माहुः ।
सर्वा गति र्याजुषी हैव शश्वत् । 49 (10)

T.B.3.12.9.2

सर्वं तेज स्सामरूप्यं ह शश्वत् । सर्वं हेदं ब्रह्मणा हैव सृष्टं ॥
ऋग्भ्यो जातं वैश्यं वर्ण-माहुः । यजुर्वेदं क्षत्रियस्या-हुर्योनिं ।
सामवेदो ब्राह्मणानां प्रसूतिः । पूर्वे पूर्वेभ्यो वच एत-दूचुः ॥
आदर्श-मग्निं चिन्वानाः । पूर्वे विश्व सृजोऽमृताः ।
शतं वर्ष सहस्राणि । दीक्षिताः सत्र-मासत ॥ 50 (10)

T.B.3.12.9.3

तप आसीद् गृहपतिः । ब्रह्म ब्रह्माभवत् स्वयं ।
सत्यं ह हो तैषामासीत् । यद् विश्वसृज आसत ॥

अ॒मृत॑-मे॒भ्य उ॒दगा॑यत् । स॒हस्रं॑ प॒रिव॑त्स॒रान् ।
 भू॒त॒ ह प्र॑स्तो तैषा॒मासी॑त् । भ॒विष्य॑त् प्र॒ति चा॑हरत् ॥
 प्रा॒णो अ॒ध्वर्यु॑-र॒भवत् । इ॒द॒ सर्व॑ सिषा॒सतां॑ । 51 (10)

T.B.3.12.9.4

अ॒पा॒नो वि॒द्वा-ना॑वृतः । प्र॒ति प्रा॑तिष्ठ-द॒ध्वरे॑ ॥
 आ॒र्त॒वा उ॒पगा॑तारः । स॒दस्या॑ ऋ॒तवो॑-ऽभवन् ।
 अ॒र्द्धमा॑साश्च मा॒साश्च॑ । च॒मसा॑-ध्व॒र्यवो॑-ऽभवन् ॥
 अ॒श॒ स॒द् ब्र॑ह्मण-स्तेजः । अ॒च्छा॒वाको॑ ऽभव॒द् यशः॑ ।
 ऋ॒त-मे॒षां प्र॑शास्ता-ऽसीत् ।
 यद् वि॒श्व सृ॑ज आ॒सत॑ ॥ 52 (10)

T.B.3.12.9.5

ऊ॒र्ग-रा॒जान॑-मु॒दव॑हत् । ध्रु॒व गो॑पः स॒हो-ऽभव॑त् ।
 ओ॒जो-ऽभ्य॑ष्टौ॒द् ग्रा॑व्.ण्णः । यद् वि॒श्व सृ॑ज आ॒सत॑ ॥
 अ॒पचि॑तिः पो॒त्रीया॑-म॒यज॑त् । ने॒ष्ट्रीया॑-म॒यज॑त् त्वि॒षिः ।
 आ॒ग्नी॒ध्वाद् वि॒दुषी॑ स॒त्यं । श्र॒द्धा है॒वा य॑जथ् स्व॒यं ॥
 इ॒रा प॒त्नी वि॒श्व सृ॑जां । आ॒कू॒ति-र॑पि॒नडू॒विः । 53 (10)

T.B.3.12.9.6

इ॒द्ध्म॑ꣳ ह॒ क्षु॒च् चै॑भ्य॒ उ॒ग्रे । तृ॒ष्णा॒ चा॒ वह॑तामु॒भे ॥
वा॒गेषा॑ꣳ सु॒ब्रह्म॑ण्या-ऽऽसी॒त् । छ॒न्दो॒ यो॒गान् वि॒जान॑ती ।
क॒ल्प॒तन्त्रा॑णि त॒न्वा॒ना-ऽहः॑ । स॒ꣳस्थाश्च॑ स॒र्वशः॑ ॥
अ॒हो॒रा॒त्रे प॑शुपा॒ल्यौ । मु॒हूर्त्ताः प्रे॒ष्या अभ॑वन् ।
मृ॒त्युस् तद॑-भ॒व-द्वा॒ता । श॒मि॒तो ग्रो वि॒शां प॑तिः ॥ 54 (10)

T.B.3.12.9.7

वि॒श्वसृ॑जः प्रथ॒माः स॒त्र-मा॑सत । स॒हस्र॑ स॒मं प्र॑सु॒तेन॒ यन्तः॑ ।
ततो॑ ह॒ जज्ञे॑ भु॒वन॑स्य गो॒पाः । हि॒र॒ण्म॑यः श॒कुनि॑ ब्र॒ह्म ना॑म ॥
येन॑ सूर्य॒-स्त॑प॒ति ते॒ज॒से-द्धः॑ । पि॒ता पु॒त्रेण॑ पि॒तृमा॑न् यो॒नियो॑नौ ।
नावे॑दविन् म॒नुते॒ तं बृ॑ह॒न्तं । स॒र्वानु॑भु-मा॒त्मान॑ꣳ संप॒राये ॥
ए॒ष नित्यो॑ म॒हिमा ब्रा॑ह्म॒णस्य॑ ।
न क॑र्म॒णा वर्द्ध॑ते नो क॒नीया॑न् ॥ 55 (10)

T.B.3.12.9.8

तस्यै॑वात्मा प॒दवि॑त्तं वि॒दित्वा॑ । न क॑र्म॒णा लि॑प्यते पा॒पके॑न ॥
पञ्च॑पञ्चा॒शत॑-स्त्रि॒वृत्तः॑ स॒म्व॑त्स॒राः ।
पञ्च॑पञ्चा॒शतः॑ पञ्च॒द॒शाः । पञ्च॑पञ्चा॒शतः॑ स॒प्तद॒शाः ।

पञ्चपञ्चा॒शत॑ एकवि॒ंशः॑ ।

वि॒श्वसृ॒जाँ॑ सहस्र॑ सम्॒वत्सरं॑ ॥

ए॒तेन॒ वै वि॒श्वसृ॒ज इ॒दं वि॒श्व-म॑सृजन्त ।

यद् वि॒श्व-म॑सृजन्त । तस्मा॑द् वि॒श्वसृ॒जः () ॥

वि॒श्व-मे॒ना-न॒नु प्र॑जायते । ब्र॒ह्मणः॑ सायु॒ज्यँ स॒लो॒कतां॑ य॒न्ति ।

ए॒तासा॑मे॒व दे॒वता॑नाँ॒ सायु॑ज्यं । सा॒र्षिताँ॑ स॒मान लो॒कतां॑ य॒न्ति ।

य ए॒त-दु॑पयन्ति । ये चै॒नत् प्रा॑हुः ।

येभ्य॑-श्चै॒नत् प्रा॑हुः ॥

ओं ॥ 56 (18)

(श॒श्व - दा॒सत॑ - सि॒षा॒सता॑ - मा॒सत॑ - ह॒विष् - प॒तिः -

क॒नी॒यान् - तस्मा॑द् वि॒श्वसृ॒जोऽष्टौ॑ च) (A9)

=====

काठके तृतीयः प्रश्नः – (TB 3.12)

Prapaataka Korvai with starting Padams of 1 to 9 Anuvaakams :-

(तु॒भ्यं॑ – दे॒वेभ्य॑ – स्त॒पसा॑ – दे॒वेभ्यो॑ – ब्र॒ह्म॑ वै चतु॒र्.हो॒तारो॑
– यच्चा॒मृ॒तꣳ – सर्वा॑ दि॒शो दि॒क्षु – सर्वा॑ दि॒व – मृ॒चां
प्रा॒ची न॒व)

Korvai with starting Padams of 1, 11, 21 Series of Dasinis :-

(तु॒भ्यं॑ – त॒पसा॑ – ता वा ए॒ताः पञ्च॑ – हि॒रण्यं॑ ददा॒ति –
सर्वा॑ दि॒श – स्त॒प आ॒सीद्गृ॒हप॑तिः षट्पञ्चा॒शत्)

First and Last Padam 3rd Prapaatakam of Kaatakam:-

(तु॒भ्य-मो॑ं)

॥ हरिः॑ ओं ॥

॥ तैत्तिरीय यजुर्ब्राह्मणे काठके तृतीय प्रश्नः समाप्तः ॥

॥ इति तैत्तिरीय यजुर्ब्राह्मणे काठकं समाप्तं ॥

=====

Appendix (of expansions)

T.B.3.12.1.1 – तुभ्यन्ता अङ्गिरस्तमा{21} श्याम तङ्काममग्ने {22}

तुभ्यं ता अङ्गिरस्तमा विश्वाः सुक्षितयः पृथक् ।

अग्ने कामाय येमिरे ॥ {21}

अश्याम तं काममग्ने तवो त्यश्याम रयिꣳ रयिवः सुवीरं ।

अश्याम वाजमभि वाजयन्तो ऽश्याम द्युम्नमजराजरं ते ॥

(Both {21} and {22} appearing in TS 1.3.14.3)

T.B.3.12.1.1 – आशानां त्वा{23} विश्वा आशाः{24}

आशानां त्वा ऽऽशापालेभ्यः । चतुर्भ्यो अमृतैभ्यः ।

इदं भूतस्याध्यक्षेभ्यः । विधेम हविषा वयम् ॥ {23}

विश्वा आशा मधुना सꣳसृजामि । अनमीवा आप ओषधयो भवन्तु ।

अयं यजमानो मृधो व्यस्यताम् अगृभीताः पशवः सन्तु सर्वे ॥ {24}

(Both {23} and {24} appearing in T.B.2.5.3.3)

T.B.3.12.1.1 – अनु॑ नोऽद्या॑नुमति॑{25} रन्विद॑नुमते॑ त्वं॑{26}

अनु॑ नोऽद्या॑नुमति॑र्यज्ञं॑ दे॒वेषु॑ मन्यतां॑ ।

अ॒ग्निश्च॑ ह॒व्यवा॑हनो॒ भवतां॑ दा॒शुषे॑ मयः॑ ॥ {25}

अन्विद॑नुमते॑ त्वं॑ मन्यासै॑ शञ्चनः॑ कृधि॑ ।

क्र॒त्वे द॑क्षाय नो हि॒नु प्र॑ण॒ आयू॑र्षि तारिषः॑ ॥ {26}

(Both {25} and {26} appearing in T.S.3.11.3.3)

T.B.3.12.1.1 – कामो॑ भूत॑स्य{27} काम॑स्तद॒ग्रे॑{28}

कामो॑ भूत॑स्य॒ भव्य॑स्य । स॒म्राडे॑को॒ विरा॑जति । स इ॒दं प्र॑ति पप्रथे ।

ऋ॒तूनु॑थ् सृजते॑ व॒शी ॥ {27}

काम॑स्तद॒ग्रे॑ स॒मव॑र्तताधि॑ । म॒नसो॑ रे॒तः प्र॑थमं॑ यदासीत्॑ ।

स॒तो ब॑न्धुम॒सति॑ निरविन्दन् । ह॒दि प्र॑ती॒ष्या क॒वयो॑ मनी॒षा ॥ {28}

(Both {27} and {28} appearing in T.B.2.4.1.9 and T.B.2.4.1.10)

T.B.3.12.1.1 – ब्रह्म जज्ञानं {29} पिता विराजां {30}

ब्रह्म जज्ञानं प्रथमं पुरस्ताद्वि सीमतः सुरुचो वेन आवः ।

स बुध्निया उपमा अस्य विष्ठाः सतश्च योनिमसतश्च विवः ॥ {29}

({29} appearing in T.S.4.2.8.2)

पिता विराजामृषभो रयीणां । अन्तरिक्षं विश्वरूप आविवेश ।

तमर्के-रभ्यर्चन्ति वथ्सं । ब्रह्म सन्तं ब्रह्मणा वर्द्धयन्तः ॥ {30}

({30} appearing in T.B.2.8.8.9)

T.B.3.12.1.1 – यज्ञो रायो {31} ऽयं यज्ञः {32}

यज्ञो रायो यज्ञ ईशे वसूनाम् । यज्ञः सस्यानामुत सुक्षितीनाम् ।

यज्ञ इष्टः पूर्वचित्तिं दधातु । यज्ञो ब्रह्मण्वाꣳ अप्येतु देवान् ॥ {31}

अयं यज्ञो वर्धतां गोभिरश्वैः । इयं वेदिः स्वपत्या सुवीरा ।

इदं बर्.हिरति बर्.हीꣳष्यन्या । इमं यज्ञं विश्वे अवन्तु देवाः ॥ {32}

(Both {31} and {32} appearing in T.B.2.5.5.1)

T.B.3.12.1.1 – आपो भद्रा{33} आदित्पश्यामि{34}

आपो भद्रा घृतमिदाप आसुरग्नी-षोमौ बिभ्रत्याप इत् ताः ।
तीव्रो रसो मधुपृचा मरंगम आ मा प्राणेन सह वर्चसा गन् ॥ {33}

आदित् पश्याम्युत वा शृणोम्या मा घोषो गच्छति वाङ् आसां ।
मन्ये भेजानो अमृतस्य तर्हि हिरण्यवर्णा अतृपं यदा वः ॥ {34}

(Both {33} and {34} appearing in T.S.5.6.1.3 and 5.6.1.4)

T.B.3.12.1.1 – तुभ्यं भरन्ति{35} यो देह्यः{36}

तुभ्यं भरन्ति क्षितयो यविष्ठ । बलिमग्ने अन्ति त ओत दूरात् ।
आ भन्दिष्ठस्य सुमतिं चिकिद्धि । बृहत्ते अग्ने महि शर्म भद्रम् ॥ {35}

यो देह्यो अनमयद्वधस्नैः । यो अर्यपत्नी-रुषसश्चकार ।
स निरुध्या नहुषो यह्यो अग्निः । विशश्चक्रे बलिहतः सहोभिः ॥ {36}

(Both {35} and {36} appearing in T.B.2.4.7.9)

T.B.3.12.1.1 - पूर्व देवा अपरेण{37} प्राणापानौ{38}

पूर्व देवा अपरेणा-नुपश्यञ्जन्मभिः । जन्मान्यवरैः पराणि ।
वेदानि देवा अयमस्मीति माम् । अहं हित्वा शरीरं जरसः
परस्तात् ॥ {37}

प्राणापानौ चक्षुः श्रोत्रम् । वाचं मनसि संभृताम् ।
हित्वा शरीरं जरसः परस्तात् । आ भूतिं भूतिं वयमश्नवामहै ॥ {38}
(Both {37} and {38} appearing in T.B.2.5.6.5)

T.B.3.12.1.1 – हव्यवाह{39} स्विष्टं॑{40}

हव्यवाह-मभिमातिषाऽहम् । रक्षोहणं पृतनासु जिष्णुम् ।
ज्योतिष्मन्तं दीद्यतं पुरन्धिम् । अग्निं स्विष्टकृतमा हुवेम ॥ {39}

स्विष्टमग्ने अभि तत् पृणाहि । विश्वा देव पृतना अभिष्य ।
उरुं नः पन्थां प्रदिशन्वि भाहि । ज्योतिष्मद्धेह्यजरं न आयुः ॥ {40}
(Both {39} and {40} appearing in T.B.2.4.1.4)

T.B.3.12.3.4 – अ॒ग्नि॒ मूर्धा॑{41} भुवः॑{42}

अ॒ग्नि॒मूर्धा॑ दि॒वः क॒कुत् पतिः॑ पृ॒थि॒व्या अ॒यं ।

अ॒पाꣳ रेताꣳसि॑ जि॒न्वति॑ ॥ {41}

भुवो॑ य॒ज्ञस्य॑ र॒जसश्च॑ ने॒ता यत्रा॑ नि॒युद्धिः॑ सच॑से शि॒वाभिः॑ ।

दि॒वि मूर्धा॑नं दधि॑षे सुव॒र्षां जि॒ह्वा॒मग्ने॑ च॒कृषे॑ ह॒व्य॒वाहं॑ ॥ {42}

(Both {41} and {42} appearing in T.S.4.4.4.1)

T.B.3.12.3.4 – अनु॑ नोऽद्या॑नु॒मति॑{43} रन्वि॑दनु॒मते॒त्वं{44}

Same as {25} and {26} above

T.B.3.12.3.4 – ह॒व्य॒वाह॑{45} स्विष्टं॑{46}

Same as {39} and {40} above

Anuvakam 6

in the entire 6th Anuvakam " सर्वास्ताः" apperaing 16 times in short form which are highlighted by us in the text for identification. The expansion is as follows and is common for the all the 16 appearances.

सर्वास्ता इष्टकाः कृत्वा । उप कामदुघा दधे ।

तेनर्षिणा तेन ब्रह्मणा । तया देवतया-ऽङ्गिरस्वद्-ध्रुवा सीद ॥

(Appearing in T.B.3.12.6.1)

Anuvakam 7

in the entire 7th Anuvakam " सर्वास्ताः" apperaing 13 times in short form which are highlighted by us in the text for identification.

The expansion is as follows and is common for the all the 13 appearances.

सर्वास्ता इष्टकाः कृत्वा । उप कामदुघा दधे ।

तेनर्षिणा तेन ब्रह्मणा । तया देवतया-ऽङ्गिरस्वद्-ध्रुवा सीद ॥

(Appearing in T.B.3.12.7.1)

Anuvakam 8

in the entire 8th Anuvakam " सर्वास्ताः" apperaing 7 times in short form which are highlighted by us in the text for identification. The expansion is as follows and is common for the all the 7 appearances.

सर्वास्ता इष्टकाः कृत्वा । उप कामदुघा दधे ।

तेनर्षिणा तेन ब्रह्मणा । तया देवतया-ऽङ्गिरस्वद्-ध्रुवा सीद ॥

(Appearing in T.B.3.12.8.1)

तैत्तिरीय ब्राह्मणम् – (TB 3.12)

3.12 For Kaatakam - 3 (TB 3.12)

	Dasini	Vaakyams
Anuvakam 1	1	10
Anuvakam 2	9	161
Anuvakam 3	4	44
Anuvakam 4	7	121
Anuvakam 5	13	129
Anuvakam 6	6	60
Anuvakam 7	5	51
Anuvakam 8	3	33
Anuvakam 9	8	88
Total →	56	697

For Kaatakam - 1, 2 and 3

	Anuvaakam	Dasini	Vaakyams
Prapaatakam1	11	49	526
Prapaatakam2	10	62	593
Prapaatakam3	9	56	697
Total →	30	167	1816

काठके तृतीयः प्रश्नः – (TB 3.12)

Summary for entire Braahmanam

	Prapaatakam	Anuvakam	Dasini	Vaakyam
Ashtakam 1	8	78	500	5232
Ashtakam 2	8	96	547	5795
Ashtakam 3	9	134	619	6530
Kaatakam	3	30	167	1816
Total	28	338	1833	19373
